

कृष्ण यजुर्वेदीय तैत्तिरीय
संहिता, पद, जटा, घन पाठः

7.3 सप्तमकाण्डे तृतीयः प्रश्नः - सत्रजातनि

Contents

TS 7.3.1.1	5
TS 7.3.1.2	5
TS 7.3.1.3	6
TS 7.3.1.4	7
TS 7.3.2.1	8
TS 7.3.2.2	9
TS 7.3.3.1	10
TS 7.3.3.2	10
TS 7.3.4.1	11
TS 7.3.4.2	12
TS 7.3.5.1	13
TS 7.3.5.2	14
TS 7.3.5.3	15

	2
TS 7.3.6.1	16
TS 7.3.6.2	17
TS 7.3.7.1	18
TS 7.3.7.2	19
TS 7.3.7.3	20
TS 7.3.7.4	21
TS 7.3.8.1	22
TS 7.3.8.2	22
TS 7.3.9.1	23
TS 7.3.9.2	24
TS 7.3.9.3	25
TS 7.3.10.1	26
TS 7.3.10.2	27
TS 7.3.10.3	28

	3
TS 7.3.10.4	29
TS 7.3.10.5	30
TS 7.3.11.1	31
TS 7.3.11.2	32
TS 7.3.11.3	33
TS 7.3.12.1	34
TS 7.3.13.1	35
TS 7.3.14.1	36
TS 7.3.15.1	36
TS 7.3.16.1	37
TS 7.3.16.2	38
TS 7.3.17.1	39
TS 7.3.18.1	40
TS 7.3.19.1	41

TS 7.3.20.1

42

TS 7.3.1.1**TS 7.3.1.1****Samhita Paata**

प्रजवँ वा एतेनं यन्ति यद्दशममहः पापावहीयं वा एतेनं भवन्ति यद्दशममह्यो वै प्रजवँ
 यतामपथेन प्रतिपद्यते यः स्थाणुः हन्ति यो भेषं न्येति स हीयते स यो वै दशमेऽहन्नविवाक्य
 उपहन्यते स हीयते तस्मै य उपहताय व्याह तमेवान्वारभ्य समंश्रुतेऽथ यो व्याह स - []

Pada Paata

प्रजवमिति प्र - जवम् । वै । एतेनं । यन्ति । यत् । दशमम् । अहः । पापावहीयमिति पाप
 - अवहीयम् । वै । एतेनं । भवन्ति । यत् । दशमम् । अहः । यः । वै । प्रजवमिति
 प्र - जवम् । यताम् । अपथेन । प्रतिपद्यत इति प्रति - पद्यते । यः । स्थाणुम् । हन्ति ।
 यः । भेषम् । न्येतीति नि - एति । सः । हीयते । सः । यः । वै । दशमे । अहन्नं
 । अविवाक्य इत्यवि - वाक्ये । उपहन्यत इत्युप-हन्यते । सः । हीयते । तस्मै । यः ।
 उपहतायेत्युप-हताय । व्याहेति वि - आह । तम् । एव । अन्वारभ्येत्यनु - आरभ्य । समिति
 । अंश्रुते । अथ । यः । व्याहेति वि - आह । सः । 1 (50)

TS 7.3.1.2**TS 7.3.1.2****Samhita Paata**

ही॒य॒ते॒ तस्मा॑द्-द॒श॒मे ऽह॑न्नवि॒वा॒क्य॒ उप॑ह॒ताय॒ न व्यु॑च्य॒मथो॒ खल्वा॑हुर्य॒ज्ञस्य॒ वै समृ॑द्धेन दे॒वाः सु॑व॒र्गं
लो॒कमा॑यन् य॒ज्ञस्य॒ व्यृ॑द्धेनासु॒रान् परा॑ऽभा॒वय॑न्निति॒ यत् खलु॑ वै य॒ज्ञस्य॒ समृ॑द्धं तद्-यज॑मानस्य॒ यद्व्यृ॑द्धं
तद्भा॒तृव्य॑स्य॒ स यो॒ वै द॒श॒मेऽह॑न्नवि॒वा॒क्य॒ उप॑हन्यते॒ स ए॒वाति॑ रेचयति॒ ते ये बा॒ह्या दृ॒शीक॑वः - []

Pada Paata

ही॒य॒ते । तस्मा॑त् । द॒श॒मे । अ॒ह॒न्न । अ॒वि॒वा॒क्य॒ इत्य॑वि - वा॒क्ये । उप॑ह॒तायेत्यु॑प - ह॒ताय॒ ।
न । व्यु॑च्य॒मिति॑ वि-उ॒च्य॑म् । अथो॒ इति॑ । खलु॑ । आ॒हुः । य॒ज्ञस्य॑ । वै । समृ॑द्धेनेति॒ सं
- ऋ॒द्धेन॒ । दे॒वाः । सु॑व॒र्गमिति॑ सु॒वः - ग॒म् । लो॒कम् । आ॒य॒न् । य॒ज्ञस्य॑ । व्यृ॑द्धेनेति॒ वि -
ऋ॒द्धेन॒ । अ॒सु॒रान् । परे॑ति॒ । अ॒भा॒वय॑न् । इति॑ । यत् । खलु॑ । वै । य॒ज्ञस्य॑ । समृ॑द्धमिति॒
सं - ऋ॒द्धम् । तत् । यज॑मानस्य॒ । यत् । व्यृ॑द्धमिति॒ वि-ऋ॒द्धम् । तत् । भा॒तृव्य॑स्य॒ । सः
। यः । वै । द॒श॒मे । अ॒ह॒न्न । अ॒वि॒वा॒क्य॒ इत्य॑वि - वा॒क्ये । उप॑हन्यत॒ इत्यु॑प - ह॒न्यते॑ ।
सः । ए॒व । अ॒तीति॑ । रे॒चय॑ति॒ । ते । ये । बा॒ह्याः । दृ॒शीक॑वः ।

TS 7.3.1.3

TS 7.3.1.3

Samhita Paata

स्यु॒स्ते वि॒ ब्रू॑युर्यदि॒ तत्र॒ न वि॒न्देयु॑रन्तस्सद॒साद्-व्यु॑च्यं॒ यदि॒ तत्र॒ न वि॒न्देयु॑र्गृहप॑तिना॒ व्यु॑च्यं
तद्व्यु॑च्यमे॒वाथ॒ वा ए॒तथ॒ सर्प॑रा॒ज्ञियां ऋ॒ग्भिः स्तु॑वन्त॒यं वै सर्प॑तो॒ राज्ञी॒ यद्वा अ॒स्यां किं॑ चा॒र्चन्ति॑
यदा॑नृ॒चुस्तेने॒यः सर्प॑रा॒ज्ञी ते॒ यदे॒व किं॑ च॒ वा॒चा ऽऽनृ॑चुर्यद॒तोऽद्व्य॑र्चितार् - []

Pada Paata

स्युः । ते । वीतिं । ब्रूयुः । यदि । तत्र । न । विन्देयुः । अन्तस्सुदुसादित्यन्तः - सुदुसात् । व्युच्यमिति वि - उच्यम् । यदि । तत्र । न । विन्देयुः । गृहपतिनेति गृह - पतिना । व्युच्यमिति वि- उच्यम् । तत् । व्युच्यमिति वि - उच्यम् । एव । अथ । वै । एतत् । सर्पराज्ञिया इति सर्प - राज्ञियाः । ऋग्भिरित्यृक् - भिः । स्तुवन्ति । इयम् । वै । सर्पतः । राज्ञी । यत् । वै । अस्याम् । किम् । च । अर्चन्ति । यत् । आनृचुः । तेन । इयम् । सर्पराज्ञीति सर्प-राज्ञी । ते । यत् । एव । किम् । च । वाचा । आनृचुः । यत् । अतोधि । अर्चितारः ।

TS 7.3.1.4**TS 7.3.1.4****Samhita Paata**

-स्तदुभयमाप्त्वा ऽवरुद्धयोत् तिष्ठामेति ताभिर्मनसा स्तुवते न वा इमामंश्चरथो नाऽश्वतरीरथः सद्यः पर्याप्तुमरहति मनो वा इमाः सद्यः पर्याप्तुमरहति मनः परिभवितुमथ ब्रह्म वदन्ति परिमिता वा ऋचः परिमितानि सामानि परिमितानि यजूंष्यथैतस्यैवान्तो नास्ति यद्ब्रह्म तत् प्रतिगृणत आ चक्षीत् स () प्रतिगुरः ॥

Pada Paata

तत् । उ॒भय॑म् । आ॒स्वा । अ॒व॒रु॒द्धये॑त्य॒व - रु॒द्धय॑ । उ॒दि॒ति । ति॒ष्ठाम् । इति॑ । ताभिः । मन॑सा । स्तु॒वते॑ । न । वै । इ॒माम् । अ॒श्व॒रथ॑ इत्य॒श्व - र॒थः । न । अ॒श्व॒त॒री॒रथ॑ इत्य॒श्व॒त॒री - र॒थः । स॒द्यः । पर्या॑प्तुमि॒ति परि॑-आ॒प्तुम् । अ॒रु॒ह॒ति । मनः॑ । वै । इ॒माम् । स॒द्यः । पर्या॑प्तुमि॒ति परि॑-आ॒प्तुम् । अ॒रु॒ह॒ति । मनः॑ । परि॑भ॒वितु॑मि॒ति परि॑-भ॒वितु॑म् । अथ॑ । ब्र॒ह्म । व॒द॒न्ति । परि॑मि॒ता इति॑ परि॑-मि॒ताः । वै । ऋ॒चः । परि॑मि॒ता॒नीति॑ परि॑ - मि॒ता॒नि । सा॒मा॒नि । परि॑मि॒ता॒नीति॑ परि॑ - मि॒ता॒नि । यजू॑षि । अथ॑ । ए॒तस्य॑ । ए॒व । अ॒न्तः । न । अ॒स्ति । यत् । ब्र॒ह्म । तत् । प्र॒ति॒गृ॒णत॑ इति॑ प्र॒ति - गृ॒णते॑ । एति॑ । च॒क्षी॒त । सः () । प्र॒ति॒ग॒र इति॑ प्र॒ति - ग॒रः ॥

TS 7.3.2.1

TS 7.3.2.1

Samhita Paata

ब्र॒ह्म॒वा॒दिनो॑ व॒द॒न्ति किं॑ द्वा॒द॒शा॒ह॒स्यं प्र॒थ॒मे॒ना॒ह॒र्त्वि॒जां य॒ज॑मानो वृ॒द्ध इति॑ तेज॑ इन्द्रि॒यमि॒ति किं॑ द्वि॒तीये॑नेति॑ प्रा॒णान॒न्नाद्य॑मि॒ति किं॑ तृ॒तीये॑नेति॑ त्री॒णि॒मा॒न् लो॒कानि॑ति॑ किं॑ च॒तु॒र्थे॑नेति॑ च॒तु॒ष्प॒दः प॒शूनि॑ति॑ किं॑ प॒ञ्च॒मे॒नेति॑ प॒ञ्चाक्ष॑रां प॒ङ्क्ति॑मि॒ति कि॒ञ् ष॒ष्ठे॑नेति॑ षड् ऋ॒तूनि॑ति॑ कि॒ञ् स॒प्त॒मे॒नेति॑ स॒प्तप॑दाः श॒क्र॒री॒मि॒ति - []

Pada Paata

ब्र॒ह्म॒वा॒दि॒न इति॑ ब्र॒ह्म - वा॒दि॒नः । व॒द॒न्ति । किम् । द्वा॒द॒शा॒ह॒स्येति॑ द्वा॒द॒श - अ॒ह॒स्यं । प्र॒थ॒मे॒न । अ॒ह्ना । ऋ॒त्वि॒जा॑म् । य॒ज॑मानः । वृ॒द्धे । इति॑ । तेजः॑ । इन्द्रि॒यम् । इति॑ । किम् । द्वि॒तीये॑न

। इति । प्राणानिति प्र - अनान् । अन्नाद्यमित्यन्न - अद्यम् । इति । किम् । तृतीयेन । इति ।
 । त्रीन् । इमान् । लोकान् । इति । किम् । चतुर्थेन । इति । चतुष्पद इति चतुः-पदः ।
 पशून् । इति । किम् । पञ्चमेन । इति । पञ्चाक्षरामिति पञ्च - अक्षराम् । पङ्क्तिम् । इति ।
 किम् । षष्ठेन । इति । षट् । ऋतून् । इति । किम् । सप्तमेन । इति । सप्तपदामिति सप्त
 - पदाम् । शक्करीम् । इति ।

TS 7.3.2.2

TS 7.3.2.2

Samhita Paata

किमष्टमेनेत्यष्टाक्षरां गायत्रीमिति किं नवमेनेति त्रिवृतः स्तोममिति किं दशमेनेति दशाक्षरां विराजमिति
 किमेकादशेनेत्येकादशाक्षरां त्रिष्टुभमिति किं द्वादशेनेति द्वादशाक्षरां जगतीमित्येतावद्वा अस्ति यावदेतद्-
 यावदेवास्ति तदेषां वृद्धे ॥

Pada Paata

किम् । अष्टमेन । इति । अष्टाक्षरामित्यष्टा - अक्षराम् । गायत्रीम् । इति । किम् ।
 नवमेन । इति । त्रिवृतमिति त्रि - वृतम् । स्तोमम् । इति । किम् । दशमेन । इति ।
 दशाक्षरामिति दश - अक्षराम् । विराजमिति वि - राजम् । इति । किम् । एकादशेन ।
 इति । एकादशाक्षरामित्येकादश - अक्षराम् । त्रिष्टुभम् । इति । किम् । द्वादशेन । इति ।
 द्वादशाक्षरामिति द्वादश - अक्षराम् । जगतीम् । इति । एतावत् । वै । अस्ति । यावत् ।
 एतत् । यावत् । एव । अस्ति । तत् । एषाम् । वृद्धे ॥

TS 7.3.3.1

TS 7.3.3.1

Samhita Paata

ए॒ष वा आ॒प्तो द्वा॑द॒शा॒हो यत् त्रयो॑द॒शरा॒त्रः सं॒मा॒नः॑ ह्ये॒तद॒ह॒र्यत् प्रा॒य॒णीय॑श्चोद॒यनीय॑श्च त्र्य॒तिरा॒त्रो
भव॑ति त्रयं इ॒मे लो॒का ए॒षां लो॒काना॑मा॒स्यै प्रा॒णो वै प्र॑थ॒मोऽति॑रा॒त्रो व्या॒नो द्वि॒तीयो॑ ऽपा॒नस्तृ॒तीयः
प्रा॒णापा॒नो-दा॒नेष्वे॒वान्नाद्ये॑ प्र॒ति ति॑ष्ठन्ति॒ सर्व॑मायु॑र्यन्ति॒ य ए॒वं वि॒द्वाःसं-॑स्त्रयोद॒शरा॒त्र-मा॑स॒न्ते तदा॑हु॒र्वाग्वा
ए॒षा वि॑त॒ता - []

Pada Paata

ए॒षः । वै । आ॒प्तः । द्वा॒द॒शा॒ह इति॑ द्वा॒द॒श - अ॒हः । यत् । त्रयो॑द॒शरा॒त्र इति॑ त्रयोद॒श - रा॒त्रः
। सं॒मा॒नम् । हि । ए॒तत् । अ॒हः । यत् । प्रा॒य॒णीय॑ इति॑ प्र - अ॒य॒नीयः॑ । च । उ॒द॒य॒नीय॑
इत्यु॑त् - अ॒य॒नीयः॑ । च । त्र्य॒तिरा॒त्र इति॑ त्रि - अ॒ति॒रा॒त्रः । भ॒व॒ति । त्रयः॑ । इ॒मे । लो॒काः ।
ए॒षाम् । लो॒काना॑म् । आ॒स्यै । प्रा॒ण इति॑ प्र - अ॒नः । वै । प्र॑थ॒मः । अ॒ति॒रा॒त्र इत्य॑ति - रा॒त्रः
। व्या॒न इति॑ वि - अ॒नः । द्वि॒तीयः॑ । अ॒पा॒न इत्य॑प-अ॒नः । तृ॒तीयः॑ । प्रा॒णापा॒नोदा॒नेष्विति॑
प्रा॒णापा॒न - उ॒दा॒नेषु॑ । ए॒व । अ॒न्नाद्य॑ इत्य॑न्न - अ॒द्यै । प्र॒तीति॑ । ति॒ष्ठन्ति॑ । सर्व॑म् । आयुः॑
। य॒न्ति । ये । ए॒वम् । वि॒द्वाःसं॑ । त्रयो॑द॒शरा॒त्रमि॑ति॒ त्रयोद॒श - रा॒त्रम् । आ॑स॒न्ते । तत् ।
आ॒हुः । वाक् । वै । ए॒षा । वि॑त॒तेति॑ वि - त॒ता ।

TS 7.3.3.2

TS 7.3.3.2

Samhita Paata

यद् द्वा॑द॒शा॒ह॒स्तां वि॒च्छि॑न्द्यु॒र्यन्म॑द्ध्ये ऽति॒रा॒त्रं कुर्यु॑रु॒प॒दा॒सु॒का गृ॒हप॑ते॒र्वास्व॑ स्या॒-दु॒परि॑ष्टाच्छन्दो॒मानां॑
महा॒व्रतं॑ कु॒र्वन्ति॑ संत॑तामे॒व वाच॑म॒व रु॒न्ध॒तेऽनु॑प॒दा॒सु॒का गृ॒हप॑ते॒र्वाग्भ॑वति प॒शवो॑ वै छ॒न्दो॒मा अ॒न्नं॑
महा॒व्रतं॑ यदु॒परि॑ष्टाच्छन्दो॒मानां॑ महा॒व्रतं॑ कु॒र्वन्ति॑ प॒शुषु॑ चै॒वा॒न्नाद्ये॑ च॒ प्रति॑ तिष्ठन्ति ॥

Pada Paata

यत् । द्वा॒द॒शा॒ह॒ इति॑ द्वा॒द॒श - अ॒हः । ता॒म् । वी॒ति॑ । छि॒न्द्युः । यत् । म॒द्ध्ये॑ । अ॒ति॒रा॒त्रमि॒त्यंति॑-
रा॒त्रम् । कुर्युः । उ॒प॒दा॒सु॒केत्यु॑प॒दा॒सु॒का । गृ॒हप॑ते॒रिति॑ गृ॒ह - प॒तेः । वाक् । स्या॒त् । उ॒परि॑ष्टात्
। छ॒न्दो॒मा॒नामि॒ति॑ छ॒न्दः - मा॒नाम् । म॒हा॒व्र॒तमि॒ति॑ म॒हा - व्र॒तम् । कु॒र्वन्ति॑ । संत॑तामि॒ति॑ सं-
त॒ता॒म् । ए॒व । वाच॑म् । अ॒वेति॑ । रु॒न्ध॒ते । अ॒नु॒प॒दा॒सु॒केत्यनु॑प - दा॒सु॒का । गृ॒हप॑ते॒रिति॑
गृ॒ह - प॒तेः । वाक् । भ॒वति॑ । प॒शवः॑ । वै । छ॒न्दो॒मा इति॑ छ॒न्दः - माः । अ॒न्नम् ।
म॒हा॒व्र॒तमि॒ति॑ म॒हा - व्र॒तम् । यत् । उ॒परि॑ष्टात् । छ॒न्दो॒मा॒नामि॒ति॑ छ॒न्दः - मा॒नाम् । म॒हा॒व्र॒तमि॒ति॑
म॒हा - व्र॒तम् । कु॒र्वन्ति॑ । प॒शुषु॑ । च॒ । ए॒व । अ॒न्नाद्य॑ इत्य॒न्न - अ॒द्ये । च॒ । प्र॒तीति॑ । तिष्ठ॑न्ति ॥

TS 7.3.4.1

TS 7.3.4.1

Samhita Paata

आदित्या अकामयन्तो-भयोर्लोकयोर् ऋद्ध्यामेति त एतं चतुर्दशरात्र- मपश्यन् तमाऽहरन् तेनायजन्त
ततो वै त उभयोर्-लोकयो-राद्ध्वन्तस्मिंश्चा-मुष्मिंश्च य एवं विद्वांस-श्चतुर्दशरात्रमासंत उभयोरेव
लोकयोर् ऋद्ध्वन्त्यस्मिंश्चा-मुष्मिंश्च चतुर्दशरात्रो भवति सप्त ग्राम्या ओषधयः सप्ताऽऽरण्या
उभयीषामवरुद्ध्यै यत् पराचीनानि पृष्ठानि - []

Pada Paata

आदित्याः । अकामयन्त । उभयोः । लोकयोः । ऋद्ध्याम् । इति । ते । एतम् ।
चतुर्दशरात्रमिति चतुर्दश - रात्रम् । अपश्यन् । तम् । एति । अहरन् । तेन । अयजन्त ।
ततः । वै । ते । उभयोः । लोकयोः । आद्ध्वन्त । अस्मिन् । च । अमुष्मिन् । च ।
। ये । एवम् । विद्वांसः । चतुर्दशरात्रमिति चतुर्दश - रात्रम् । आसन्ते । उभयोः । एव
। लोकयोः । ऋद्ध्वन्ति । अस्मिन् । च । अमुष्मिन् । च । चतुर्दशरात्र इति चतुर्दश -
रात्रः । भवति । सप्त । ग्राम्याः । ओषधयः । सप्त । आरण्याः । उभयीषाम् । अवरुद्ध्या
इत्यवरुद्ध्यै । यत् । पराचीनानि । पृष्ठानि ।

TS 7.3.4.2

TS 7.3.4.2

Samhita Paata

भवन्त्यमुमेव तैर्लोकमभि जयन्ति यत् प्रतीचीनानि पृष्ठानि भवन्तीममेव तैर्लोकमभि जयन्ति

त्रयस्त्रिंशौ म॑द्वय॒तः स्तोमौ॑ भव॒तः साम्रा॑ज्यमे॒व गच्छ॑न्त्यधि॒राजौ॑ भ॒वतोऽधि॒राजा॑ ए॒व स॑मा॒नानां॑
भव॑न्त्यति॒रात्रा॒व॒भितो॑ भव॒तः परि॑गृहीत्यै ॥

Pada Paata

भव॑न्ति । अ॒मुम् । ए॒व । तैः । लो॒कम् । अ॒भीति॑ । ज॒यन्ति॑ । यत् । प्र॒ती॒चीना॑नि । पृ॒ष्ठानि॑
। भव॑न्ति । इ॒मम् । ए॒व । तैः । लो॒कम् । अ॒भीति॑ । ज॒यन्ति॑ । त्रय॑स्त्रिं॒शावि॑तिं त्रयः -
त्रिं॒शौ । म॑द्वय॒तः । स्तोमौ॑ । भ॒व॒तः । साम्रा॑ज्यमि॒ति सां - रा॒ज्यम् । ए॒व । ग॒च्छन्ति॑ ।
अ॒धि॒रा॒जावि॑त्य॒धि - रा॒जौ । भ॒व॒तः । अ॒धि॒रा॒जा इत्य॑धि - रा॒जाः । ए॒व । स॑मा॒नाना॑म् । भ॒वन्ति॑
। अ॒ति॒रा॒त्रावि॑त्य॒ति - रा॒त्रौ । अ॒भितः॑ । भ॒व॒तः । परि॑गृहीत्या इति परि - गृही॒त्यै ॥

TS 7.3.5.1

TS 7.3.5.1

Samhita Paata

प्र॒जाप॑तिः सु॒वर्गं॑ लो॒कमै॒त् तं दे॒वा अ॒न्वा॒यन् ताना॑दित्याश्च॒ प॒शव॑श्चा॒न्वा॒यन् ते दे॒वा अ॑ब्रुवन्.
यान् प॒शून्नु॒पाजी॑विष्म॒ त इ॒मे ऽन्वा॑ग्म॒न्निति॑ तेभ्य॑ ए॒तं च॑तु॒र्दश॑रा॒त्रं प्र॒त्यौह॑न् त आ॑दित्याः पृ॒ष्ठैः
सु॒वर्गं॑ लो॒कमाऽरो॑हन् त्र्य॒हाभ्या॑म॒स्मिन् लो॒के प॒शून् प्र॒त्यौह॑न् पृ॒ष्ठैरा॑दित्या अ॒मुष्मि॑न् लो॒क आर्द्ध॑वन्
त्र्य॒हाभ्या॑म॒स्मिन् - []

Pada Paata

प्रजापतिरिति प्रजा - पतिः । सुवर्गमिति सुवः - गम् । लोकम् । ऐत् । तम् । देवाः ।
 अन्विति । आयन्न । तान् । आदित्याः । च । पशवः । च । अन्विति । आयन्न ।
 ते । देवाः । अब्रुवन् । यान् । पशून् । उपार्जीविष्मेत्युप - अजीविष्म । ते । इमे ।
 अन्वाग्मन्नित्यनु-आग्मन्न । इति । तेभ्यः । एतम् । चतुर्दशरात्रमिति चतुर्दश-रात्रम् । प्रतीति
 । औहन्न । ते । आदित्याः । पृष्ठैः । सुवर्गमिति सुवः - गम् । लोकम् । एति । अरोहन्न
 । त्र्यहाभ्यामिति त्रि - अहाभ्याम् । अस्मिन्न । लोके । पशून् । प्रतीति । औहन्न । पृष्ठैः ।
 आदित्याः । अमुष्मिन्न । लोके । आर्ध्वन्न । त्र्यहाभ्यामिति त्रि - अहाभ्याम् । अस्मिन्न ।

TS 7.3.5.2

TS 7.3.5.2

Samhita Paata

लोके पशवो य एवं विद्वांसश्चतुर्दशरात्रमासन्त उभयोरेव लोकयोर् ऋद्धुवन्त्यस्मिश्चामुष्मिश्च
 पृष्ठैरेवाऽमुष्मिन् लोक ऋद्धुवन्ति त्र्यहाभ्यामस्मिन् लोके ज्योतिर्गौरायुरिति त्र्यहो भवतीयं वाव
 ज्योतिरन्तरिक्षं गौरसावायुरिमानेव लोकानभ्यारोहन्ति यदन्यतः पृष्ठानि स्युर्विविधः स्यान्मद्ध्ये
 पृष्ठानि भवन्ति सविवधत्वायौ - []

Pada Paata

लोके । पशवः । ये । एवम् । विद्वांसः । चतुर्दशरात्रमिति चतुर्दश - रात्रम् । आसन्ते ।
 उभयोः । एव । लोकयोः । ऋद्धुवन्ति । अस्मिन्न । च । अमुष्मिन्न । च । पृष्ठैः । एव

। अ॒मुष्मि॑न् । लो॒के । ऋ॒द्धु॑वन्ति । त्र्य॒हाभ्या॑मिति॑ त्रि - अ॒हाभ्या॑म् । अ॒स्मिन् । लो॒के ।
ज्योतिः॑ । गौः । आयुः॑ । इति॑ । त्र्य॒ह इति॑ त्रि-अ॒हः । भ॒वति॑ । इ॒यम् । वाव॑ । ज्योतिः॑
। अ॒न्तरि॑क्षम् । गौः । अ॒सौ । आयुः॑ । इ॒मान् । ए॒व । लो॒कान् । अ॒भ्यारो॑हन्तीत्य॑भि -
आरो॑हन्ति । यत् । अ॒न्यतः॑ । पृ॒ष्ठानि॑ । स्युः । वि॒वि॒वध॑मिति॑ वि-वि॒वध॑म् । स्यात् । म॒द्ध्यै
। पृ॒ष्ठानि॑ । भ॒वन्ति॑ । स॒वि॒वध॑त्वायेति॑ स॒विवध॑ - त्वाय॑ ।

TS 7.3.5.3

TS 7.3.5.3

Samhita Paata

-जो॑ वै वी॒र्यं॑ पृ॒ष्ठान्यो॑ज ए॒व वी॒र्यं॑ म॒द्ध्यतो॑ द॒धते॑ बृ॒हद्-र॑थन्त॒राभ्या॑ य॒न्ती॒यं वा॑व र॑थन्त॒रम॒सौ
बृ॒हदा॑भ्यामे॒व य॒न्त्यथो॑ अ॒नयो॑रे॒व प्र॒ति ति॑ष्ठन्त्ये॒ते वै य॒ज्ञस्या॑ञ्ज॒साय॑नी सु॒ती ता॑भ्यामे॒व सु॒वर्गं
लो॒कं य॑न्ति॒ परा॑ञ्चो॒ वा ए॒ते सु॒वर्गं॑ लो॒कम॒भ्यारो॑हन्ति॒ ये प॑रा॒चीना॑नि पृ॒ष्ठान्यु॑प॒यन्ति॑ प्र॒त्यङ् त्र्य॒हो
भ॑वति॒ प्र॒त्यव॑रूढ्या॒ अथो॑ प्र॒तिष्ठि॑त्या () उ॒भयो॑र्लो॒कयोर् ऋ॒द्धोत् ति॑ष्ठन्ति॒ चतु॑र्दशै॒तास्ता॑सां
या द॑श द॒शाक्ष॑रा वि॒राडन् वि॒राड् वि॒राजै॑वान्नाद्य॒मव॑ रुन्ध॒ते या॑श्चत॑स्रश्चत॑स्रो दि॒शो दि॒क्ष्वे॒व प्र॒ति
ति॑ष्ठन्त्यति॒रात्रा॑व॒भितो॑ भव॒तुः परि॑गृहीत्यै ॥

Pada Paata

ओजः॑ । वै । वी॒र्यम् । पृ॒ष्ठानि॑ । ओजः॑ । ए॒व । वी॒र्यम् । म॒द्ध्यतः॑ । दु॒धते॑ ।
बृ॒हद्-र॑थन्त॒राभ्या॑मिति॑ बृ॒हत् - र॑थन्त॒राभ्या॑म् । य॒न्ति । इ॒यम् । वाव॑ । र॑थन्त॒रमि॑ति॒ रथं॑ -

त॒रम् । अ॒सौ । बृ॒हत् । आ॒भ्याम् । ए॒व । य॒न्ति । अथो॒ इति॑ । अ॒नयोः॑ । ए॒व । प्र॒तीति॑ ।
 ति॒ष्ठन्ति॑ । ए॒ते इति॑ । वै । य॒ज्ञस्य॑ । अ॒ञ्जसा॑य॒नी इत्य॑ञ्जसा - अ॒यनी॑ । सु॒ती इति॑ । ता॒भ्याम्
 । ए॒व । सु॒वर्गमि॑ति॒ सुवः॑ - गम् । लो॒कम् । य॒न्ति । परा॑ञ्चः । वै । ए॒ते । सु॒वर्गमि॑ति॒
 सुवः॑ - गम् । लो॒कम् । अ॒भ्यारो॑ह॒न्तीत्य॑भि - आ॒रोह॑न्ति । ये । प॒रा॒चीना॑नि । पृ॒ष्ठानि॑ ।
 उ॒प॒य॒न्तीत्यु॑प - य॒न्ति । प्र॒त्यङ् । त्र्य॒ह इति॑ त्रि - अ॒हः । भ॒वति॑ । प्र॒त्यव॑रूढ्या इति॑ प्रति -
 अव॑रूढ्यै । अथो॒ इति॑ । प्र॒ति॒ष्ठित्या॑ इति॑ प्र॒ति॒स्थि॒त्यै () । उ॒भयोः॑ । लो॒कयोः॑ । ऋ॒द्धा ।
 उ॒दिति॑ । ति॒ष्ठन्ति॑ । चतु॑र्दशेति॒ चतुः॑ - द॒श । ए॒ताः । तासा॑म् । याः । द॒श । द॒शाक्ष॑रेति॒
 द॒श - अ॒क्षरा॑ । वि॒राडिति॑ वि - राट् । अ॒न्नम् । वि॒राडिति॑ वि - राट् । वि॒राजे॑ति॒ वि - राजा॑ ।
 ए॒व । अ॒न्नाद्य॑मित्य॒न्न - अ॒द्यम् । अ॒वेति॑ । रु॒न्ध॒ते । याः । च॒त॒स्रः । च॒त॒स्रः । दि॒शः । दि॒क्षु
 । ए॒व । प्र॒तीति॑ । ति॒ष्ठन्ति॑ । अ॒ति॒रा॒त्रावि॑त्य॒ति - रा॒त्रौ । अ॒भितः॑ । भ॒वतुः॑ । परि॑गृहीत्या
 इति॑ परि॑ - गृही॒त्यै ॥

TS 7.3.6.1

TS 7.3.6.1

Samhita Paata

इन्द्रो॒ वै सृ॒ष्ट्वा दे॒वता॑भि॒रासी॒त् स न॒ व्या॒वृ॒तम॑गच्छ॒त् स प्र॒जाप॑तिमु॒पा॒धाव॑त् तस्मा॑ ए॒तं प॑ञ्चदशरा॒त्रं
 प्राय॑च्छत् तमाऽह॑रत् तेना॑यजत् ततो॒ वै सोऽन्या॑भि॒र्दे॒वता॑भि॒र्व्या॒वृ॒तम॑गच्छ॒द्य ए॒वं वि॒द्वा॒श्सः प॑ञ्चदशरा॒त्रमा॑स॒ते
 व्या॒वृ॒तमे॒व पा॒प्मना॑ भ्रातृ॒व्येण॑ गच्छन्ति॒ ज्योति॑र्गौरा॒युरिति॑ त्र्य॒हो भ॑वती॒यं वा॒व ज्योति॑र॒न्तरि॑क्षं - []

Pada Paata

इन्द्रः । वै । सु॒द्यु॒ष्टि॒ति॒ स - दृ॒ङ् । दे॒वता॑भिः । आ॒सीत् । सः । न । व्या॒वृ॒त॒मि॒ति॒ वि
 - आ॒वृ॒त॒म् । अ॒ग॒च्छ॒त् । सः । प्र॒जाप॑ति॒मि॒ति॒ प्र॒जा - प॒ति॒म् । उपे॑ति॒ । अ॒धा॒व॒त् । तस्मै॑
 । ए॒त॒म् । प॒ञ्च॒द॒श॒रा॒त्र॒मि॒ति॒ प॒ञ्च॒द॒श॒-रा॒त्र॒म् । प्रे॑ति॒ । अ॒य॒च्छ॒त् । त॒म् । ए॒ति॒ । अ॒ह॒र॒त् ।
 तेन॑ । अ॒य॒ज॒त् । ततः॑ । वै । सः । अ॒न्याभिः॑ । दे॒वता॑भिः । व्या॒वृ॒त॒मि॒ति॒ वि - आ॒वृ॒त॒म्
 । अ॒ग॒च्छ॒त् । ये । ए॒व॒म् । वि॒द्वा॒ऽसः॑ । प॒ञ्च॒द॒श॒रा॒त्र॒मि॒ति॒ प॒ञ्च॒द॒श॒-रा॒त्र॒म् । आ॒स॒न्ते ।
 व्या॒वृ॒त॒मि॒ति॒ वि - आ॒वृ॒त॒म् । ए॒व । पा॒प्म॒ना॑ । भ्रातृ॑व्येण । ग॒च्छ॒न्ति॒ । ज्योतिः॑ । गौः ।
 आयुः॑ । इति॑ । त्र्य॒ह इति॑ त्रि - अ॒हः । भ॒व॒ति॒ । इ॒य॒म् । वा॒व । ज्योतिः॑ । अ॒न्तरि॑क्षम् ।

TS 7.3.6.2

TS 7.3.6.2

Samhita Paata

गौर॒सा॒वा॒यु॒रे॒ष्वे॒व लो॒केषु॑ प्र॒ति॒ ति॒ष्ठ॒न्त्य॒स॒त्रं वा॑ ए॒तद्-य॒द॒छ॒न्दो॒मं य॒च्छ॒न्दो॒मा भ॒व॒न्ति॑ तेन॑ स॒त्रं
 दे॒वता॑ ए॒व पृ॒ष्ठैर॒व॑ रु॒न्ध॒ते प॒शू॒ञ्छ॒न्दो॒मैरो॒जो वै वी॒र्यं॑ पृ॒ष्ठानि॑ प॒श॒वः छ॒न्दो॒मा ओज॑स्ये॒व वी॒र्यं॑ प॒शुषु॑
 प्र॒ति॒ ति॒ष्ठ॒न्ति॑ प॒ञ्च॒द॒श॒रा॒त्रो भ॑वति प॒ञ्च॒द॒शो व॒ज्रो व॒ज्रमे॒व भ्रातृ॑व्येभ्यः प्र ह॑रन्त्यति॒रा॒त्रा॒व॒भितो॑ भवत
 इन्द्रि॒यस्य॑ () परि॑गृहीत्यै ॥

Pada Paata

गौः । अ॒सौ । आयुः॑ । ए॒षु । ए॒व । लो॒केषु॑ । प्र॒ती॒ति॒ । ति॒ष्ठ॒न्ति॒ । अ॒स॒त्र॒म् । वै । ए॒तत्
 । यत् । अ॒छ॒न्दो॒म॒मि॒त्य॒छ॒न्दः - म॒म् । यत् । छ॒न्दो॒मा इति॑ छ॒न्दः - माः । भ॒व॒न्ति॑ । तेन॑

। सुत्रम् । देवताः । एव । पृष्ठैः । अवेति । रुन्धते । पशून् । छन्दोमैरिति छन्दः-मैः ।
 ओजः । वै । वीर्यम् । पृष्ठानि । पशवः । छन्दोमा इति छन्दः - माः । ओजसि । एव
 । वीर्ये । पशुषु । प्रतीति । तिष्ठन्ति । पञ्चदशरात्र इति पञ्चदश - रात्रः । भवति । पञ्चदश
 इति पञ्च - दशः । वज्रः । वज्रम् । एव । भ्रातृव्येभ्यः । प्रेति । हरन्ति । अतिरात्रावित्यति
 - रात्रौ । अभितः । भवतः । इन्द्रियस्य () । परिगृहीत्या इति परि - गृहीत्यै ॥

TS 7.3.7.1

TS 7.3.7.1

Samhita Paata

इन्द्रो वै शिथिल इवाऽप्रतिष्ठित आसीत् सोऽसुरेभ्योऽबिभेत् स प्रजापतिमुपाऽधावत् तस्मा एतं
 पञ्चदशरात्रं वज्रं प्रायच्छत् तेनासुरान् पराभाव्य विजित्य श्रियं गच्छदग्निष्टुतां पाप्मानं निरदहत
 पञ्चदशरात्रेणौजो बलमिन्द्रियं वीर्यमात्मनधत् य एवं विद्वांसः पञ्चदशरात्रमासते भ्रातृव्यानेव
 पराभाव्य विजित्य श्रियं गच्छन्त्यग्निष्टुतां पाप्मानं नि - []

Pada Paata

इन्द्रः । वै । शिथिलः । इव । अप्रतिष्ठित इत्यप्रति - स्थितः । आसीत् । सः । असुरेभ्यः
 । अबिभेत् । सः । प्रजापतिमिति प्रजा - पतिम् । उपेति । अधावत् । तस्मै । एतम् ।
 पञ्चदशरात्रमिति पञ्चदश - रात्रम् । वज्रम् । प्रेति । अयच्छत् । तेन । असुरान् । पराभाव्येति
 परा - भाव्यं । विजित्येति वि-जित्यं । श्रियम् । अगच्छत् । अग्निष्टुतेत्यग्नि - स्तुतां । पाप्मानम्

। निरिति॑ । अ॒द॒ह॒त॒ । प॒ञ्चद॒श॒रा॒त्रेणेति॑ पञ्चदश - रा॒त्रेण॑ । ओजः॑ । बल॑म् । इन्द्रि॒यम् । वी॒र्य॑म् । आ॒त्मन् । अ॒ध॒त्त॒ । ये । ए॒वम् । वि॒द्वा॒ऽसः॑ । प॒ञ्चद॒श॒रा॒त्रमिति॑ पञ्चदश - रा॒त्रम् । आस॑ते । भ्रातृ॑व्यान् । ए॒व । प॒रा॒भा॒व्येति॑ परा - भा॒व्य॑ । वि॒जित्येति॑ वि - जि॒त्य॑ । श्रि॒य॑म् । ग॒च्छ॒न्ति॒ । अ॒ग्नि॒ष्टुतेत्य॑ग्नि - स्तुता॑ । पा॒प्मान॑म् । निरिति॑ ।

TS 7.3.7.2

TS 7.3.7.2

Samhita Paata

दे॒हन्ते॑ पञ्चदशरा॒त्रेणौजो॑ बल॑मिन्द्रि॒यं वी॒र्य॑मा॒त्मन् द॑धत ए॒ता ए॒व प॑श॒व्याः॑ पञ्चद॒श वा अ॑र्द्धमा॒सस्य॑ रा॒त्रयोऽर्द्ध॑मा॒स॒शः स॑व॒त्स॒र आ॑प्यते स॑व॒त्स॒रं प॑श॒वोऽनु॑ प्र जा॒यन्ते॑ तस्मा॑त् प॒श॒व्या ए॒ता ए॒व सु॑व॒र्ग्याः॑ पञ्चद॒श वा अ॑र्द्धमा॒सस्य॑ रा॒त्रयोऽर्द्ध॑मा॒स॒शः स॑व॒त्स॒र आ॑प्यते स॑व॒त्स॒रः सु॑व॒र्गो लो॒कस्तस्मा॑त् सु॒व॒र्ग्या ज्योति॑र्गो॒रायु॑रिति॑ त्र्य॒हो भ॑वती॒यं वा॒व ज्योति॑र॒न्तरि॑क्षं - []

Pada Paata

द॒ह॒न्ते॑ । प॒ञ्चद॒श॒रा॒त्रेणेति॑ पञ्चदश - रा॒त्रेण॑ । ओजः॑ । बल॑म् । इन्द्रि॒यम् । वी॒र्य॑म् । आ॒त्मन् । द॒ध॒ते॑ । ए॒ताः । ए॒व । प॒श॒व्याः॑ । प॒ञ्चद॒शेति॑ पञ्च - द॒श । वै । अ॒र्द्ध॑मा॒सस्येत्य॑र्द्ध - मा॒सस्य॑ । रा॒त्रयः॑ । अ॒र्द्ध॑मा॒स॒श इत्य॑र्द्धमा॒स - शः॑ । स॑व॒त्स॒र इति॑ सं-व॒त्स॒रः । आ॑प्य॒ते । स॑व॒त्स॒रमिति॑ सं-व॒त्स॒रम् । प॒श॒वः॑ । अ॒नु॑ । प्रेति॑ । जा॒य॒न्ते॑ । तस्मा॑त् । प॒श॒व्याः॑ । ए॒ताः । ए॒व । सु॒व॒र्ग्या इति॑ सु॒वः - र्ग्याः॑ । प॒ञ्चद॒शेति॑ पञ्च - द॒श । वै । अ॒र्द्ध॑मा॒सस्येत्य॑र्द्ध - मा॒सस्य॑ । रा॒त्रयः॑ । अ॒र्द्ध॑मा॒स॒श इत्य॑र्द्धमा॒स - शः॑ । स॑व॒त्स॒र इति॑ सं - व॒त्स॒रः । आ॑प्य॒ते

। सु॒व॒त्स॒र इति॑ सं - व॒त्स॒रः । सु॒व॒र्ग इति॑ सु॒वः - गः । लो॒कः । तस्मा॑त् । सु॒व॒र्ग्या इति॑
 सु॒वः - ग्याः । ज्योतिः॑ । गौः । आ॒युः । इति॑ । त्र्य॒ह इति॑ त्रि - अ॒हः । भ॒व॒ति । इ॒यम्
 । वाव॑ । ज्योतिः॑ । अ॒न्तरि॑क्षम् ।

TS 7.3.7.3

TS 7.3.7.3

Samhita Paata

गौर॒सावा॒युरि॒माने॒व लो॒कान् अ॒भ्यारो॑हन्ति॒ यद॒न्यतः॑ पृ॒ष्ठानि॒ स्युर्वि॒विधः॑ स्या॒न्मद्भ्ये॑ पृ॒ष्ठानि॑ भवन्ति
 स॒वि॒ध॒त्वा॒यौजो॑ वै वी॒र्यं॑ पृ॒ष्ठान्यो॒ज ए॒व वी॒र्यं॑ म॒द्भ्यतो॑ द॒धते॑ बृ॒हद्-र॒थन्त॒राभ्यां॑ य॒न्ती॒यं वा॒व
 र॒थन्त॒रम॒सौ बृ॒हदा॒भ्यामे॒व य॒न्त्यथो॑ अ॒नयो॑रे॒व प्र॒ति ति॒ष्ठन्त्ये॒ते वै य॒ज्ञस्या॑ञ्ज॒साय॑नी स्मृ॒ती ता॒भ्यामे॒व
 सु॒व॒र्गं लो॒कं - []

Pada Paata

गौः । अ॒सौ । आ॒युः । इ॒मान् । ए॒व । लो॒कान् । अ॒भ्यारो॑हन्तीत्य॒भि - आरो॑हन्ति । यत्
 । अ॒न्यतः॑ । पृ॒ष्ठानि॑ । स्युः । वि॒वि॒धमि॒ति वि - वि॒व॒धम् । स्या॒त् । म॒द्भ्ये॑ । पृ॒ष्ठानि॑ ।
 भ॒व॒न्ति । स॒वि॒ध॒त्वा॒येति॑ स॒वि॒ध - त्वा॒यं । ओ॒जः । वै । वी॒र्यम् । पृ॒ष्ठानि॑ । ओ॒जः । ए॒व
 । वी॒र्यम् । म॒द्भ्यतोः॑ । द॒धते॑ । बृ॒हद्-र॒थन्त॒राभ्या॑मि॒ति बृ॒हद्-र॒थन्त॒राभ्या॑म् । य॒न्ति । इ॒यम् ।
 वा॒व । र॒थन्त॒रमि॒ति र॒थं - त॒रम् । अ॒सौ । बृ॒हत् । आ॒भ्याम् । ए॒व । य॒न्ति । अथो॑ इति॑ ।
 अ॒नयोः॑ । ए॒व । प्र॒तीति॑ । ति॒ष्ठन्ति॑ । ए॒ते इति॑ । वै । य॒ज्ञस्य॑ । अ॒ञ्ज॒साय॑नी इत्य॑ञ्ज॒सा-अ॒य॑नी

। सु॒ती इति॑ । ता॒भ्याम् । ए॒व । सु॒व॒र्गमि॑ति॒ सु॒वः - ग॒म् । लो॒कम् ।

TS 7.3.7.4

TS 7.3.7.4

Samhita Paata

य॑न्ति॒ परा॑ञ्चो वा ए॒ते सु॒व॒र्गं लो॒कम्भ्या॑रोहन्ति॒ ये प॑रा॒चीना॑नि पृ॒ष्ठान्यु॑पयन्ति॒ प्र॒त्यङ् त्र्य॑हो भ॑वति॒
प्र॒त्यव॑रूढ्या॒ अथो॑ प्रति॑ष्ठित्या॒ उ॒भयो॑र्लो॒कयो॑र् ऋ॒द्धोत् ति॑ष्ठन्ति॒ पञ्च॑दशै॒तास्ता॑सां॒ या द॑श॒ दशा॑क्षरा॒
वि॒राडन्नं॑ वि॒राड् वि॒राजै॑वान्नाद्य॒मव॑ रुन्धते॒ याः पञ्च॑ पञ्च॒ दिशो॑ दि॒क्ष्वेव॑ प्रति॑ तिष्ठन्त्यति॒रात्रा॑व॒भितो॑
भव॑त इन्द्रि॒यस्य॑ वी॒र्य॑स्य प्र॒जायै॑ () प॒शूनां॑ परि॒गृही॑त्यै ॥

Pada Paata

य॑न्ति॒ । परा॑ञ्चः । वै । ए॒ते । सु॒व॒र्गमि॑ति॒ सु॒वः - ग॒म् । लो॒कम् । अ॒भ्यारो॑हन्तीत्य॑भि -
आ॒रोह॑न्ति । ये । प॑रा॒चीना॑नि । पृ॒ष्ठानि॑ । उ॒पय॑न्तीत्यु॑प - यन्ति॒ । प्र॒त्यङ् । त्र्य॑ह इति॑ त्रि
- अ॒हः । भ॑वति॒ । प्र॒त्यव॑रूढ्या॒ इति॑ प्रति॒ - अव॑रूढ्यै । अथो॑ इति॑ । प्रति॑ष्ठित्या॒ इति॑ प्रति॑
- स्थि॒त्यै । उ॒भयोः॑ । लो॒कयोः॑ । ऋ॒द्धा । उ॒दि॒ति । ति॑ष्ठन्ति॒ । पञ्च॑दशेति॒ पञ्च॑ - द॒श ।
ए॒ताः । ता॑सां॒ । याः । द॑श॒ । दशा॑क्षरेति॒ दश॑ - अ॒क्षरा॑ । वि॒राडिति॑ वि - राट् । अन्न॑म्
। वि॒राडिति॑ वि - राट् । वि॒राजे॑ति॒ वि - राजा॑ । ए॒व । अ॒न्नाद्य॑मित्य॑न्न - अद्य॑म् । अवे॑ति॒ ।
रु॒न्ध॒ते । याः । पञ्च॑ । पञ्च॑ । दि॒शः । दि॒क्षु । ए॒व । प्र॒तीति॑ । ति॑ष्ठन्ति॒ । अ॒ति॒रा॒त्रावि॑त्य॑ति
- रा॒त्रौ । अ॒भितः॑ । भ॑वतः॒ । इन्द्रि॒यस्य॑ । वी॒र्य॑स्य । प्र॒जाया॑ इति॑ प्र - जायै॑ () । प॒शूनाम्

। परिगृहीत्या इति परि - गृहीत्यै ॥

TS 7.3.8.1

TS 7.3.8.1

Samhita Paata

प्रजापति-रकामयतान्नादः स्यामिति स एतः सप्तदशरात्र-मपश्यत् तमाऽहरत् तेनायजत् ततो वै
सोऽन्नादोऽभवद्य एवं विद्वांसः सप्तदश-रात्रमासते ऽन्नादा एव भवन्ति पञ्चाहो भवति पञ्च वा
ऋतवः सँवत्सर ऋतुष्वेव सँवत्सरे प्रति तिष्ठन्त्यथो पञ्चाक्षरा पङ्क्तिः पाङ्क्तो यज्ञो यज्ञमेवाऽव रुन्धते
ऽसत्रं वा एत- []

Pada Paata

प्रजापतिरिति प्रजा - पतिः । अकामयत् । अन्नाद इत्यन्न - अदः । स्याम् । इति । सः
। एतम् । सप्तदशरात्रमिति सप्तदश - रात्रम् । अपश्यत् । तम् । एति । अहरत् । तेन ।
अयजत् । ततः । वै । सः । अन्नाद इत्यन्न - अदः । अभवत् । ये । एवम् । विद्वांसः
। सप्तदशरात्रमिति सप्तदश-रात्रम् । आसते । अन्नादा इत्यन्न-अदाः । एव । भवन्ति । पञ्चाह
इति पञ्च - अहः । भवति । पञ्च । वै । ऋतवः । सँवत्सर इति सं - वत्सरः । ऋतुषु
। एव । सँवत्सर इति सं - वत्सरे । प्रतीति । तिष्ठन्ति । अथा इति । पञ्चाक्षरेति पञ्च -
अक्षरा । पङ्क्तिः । पाङ्क्तः । यज्ञः । यज्ञम् । एव । अवेति । रुन्धते । असत्रम् । वै । एतत् ।

TS 7.3.8.2

TS 7.3.8.2

Samhita Paata

-द्यद॑छन्दो॒मं यच्छ॑न्दो॒मा भव॑न्ति तेन॑ स॒त्रं दे॒वता॑ ए॒व पृ॒ष्ठैर॑व॑ रुन्धते प॒शूञ्छ॑न्दो॒मैरोजो॑ वै वी॒र्यं॑
पृ॒ष्ठानि॑ प॒शवः॑ छन्दो॒मा ओज॑स्ये॒व वी॒र्यं॑ प॒शुषु॑ प्र॒ति ति॑ष्ठन्ति स॒प्तद॑शा॒त्रो भ॑वति स॒प्तद॑शः प्र॒जाप॑तिः
प्र॒जाप॑ते॒रास्या॑ अति॒रात्रा॑व॒भितो॑ भवतो॒ऽन्नाद्य॑स्य॒ परि॑गृहीत्यै ॥

Pada Paata

यत् । अ॒छन्दो॒ममित्य॑छन्दः-मम् । यत् । छ॒न्दो॒मा इति॑ छन्दः - माः । भव॑न्ति । तेन॑ ।
स॒त्रम् । दे॒वताः॑ । ए॒व । पृ॒ष्ठैः । अ॒वेति॑ । रुन्ध॑ते । प॒शून् । छ॒न्दो॒मैरिति॑ छन्दः - मैः ।
ओज॑सः । वै । वी॒र्यम् । पृ॒ष्ठानि॑ । प॒शवः॑ । छ॒न्दो॒मा इति॑ छन्दः - माः । ओज॑सि । ए॒व ।
वी॒र्यं॑ । प॒शुषु॑ । प्र॒तीति॑ । ति॒ष्ठन्ति॑ । स॒प्तद॑शा॒त्र इति॑ सप्तदश - रा॒त्रः । भ॒वति॑ । स॒प्तद॑श इति॑
सप्त - द॒शः । प्र॒जाप॑तिरिति॑ प्र॒जा-प॑तिः । प्र॒जाप॑तेरिति॑ प्र॒जा - प॑तेः । आ॒स्यै॑ । अ॒ति॒रात्रा॑वित्य॑ति
- रा॒त्रौ । अ॒भितः॑ । भ॒वतः॑ । अ॒न्नाद्य॑स्येत्य॑न्न - अ॒द्यस्य॑ । परि॑गृहीत्या॒ इति॑ परि॑ - गृही॒त्यै ॥

TS 7.3.9.1

TS 7.3.9.1

Samhita Paata

सा वि॒राड् वि॒क्रम्या॑तिष्ठद्-ब्रह्म॑णा दे॒वेष्व॑न्नेना-सुरे॑षु ते दे॒वा अ॑कामयन्तो॒भयः॑ सं वृ॒ञ्जीम॑हि ब्रह्म॑ चान्नं॑
चेति॑ त ए॒ता वि॒श्रुतिः॑ रात्री॑रपश्यन् ततो॒ वै त उ॒भयः॑ सम॑वृञ्जत ब्रह्म॑ चान्नं॑ च ब्रह्म॑वर्च॒सिनो॑ऽन्ना॒दा
अ॑भवन्, य ए॒वं वि॒द्वांसः॑ ए॒ता आस॑न्त उ॒भय॑मे॒व सँ वृ॒ञ्जते॑ ब्रह्म॑ चान्नं॑ च - []

Pada Paata

सा । वि॒राडिति॑ वि - राट् । वि॒क्रम्येति॑ वि - क्रम्यं । अ॒तिष्ठत् । ब्रह्म॑णा । दे॒वेषु॑ । अ॒न्नेन॑ ।
असुरे॑षु । ते । दे॒वाः । अ॒काम॑यन्त । उ॒भय॑म् । समि॑ति । वृ॒ञ्जीम॑हि । ब्रह्म॑ । च । अ॒न्नम्
। च । इति॑ । ते । ए॒ताः । वि॒श्रुति॑म् । रात्रीः॑ । अ॒पश्य॑न् । ततः॑ । वै । ते । उ॒भय॑म्
। समि॑ति । अ॒वृञ्ज॑त । ब्रह्म॑ । च । अ॒न्नम् । च । ब्रह्म॑वर्च॒सिन इति॑ ब्रह्म॑ - वर्च॒सिनः॑ ।
अ॒न्ना॒दा इत्य॑न्न - अ॒दाः । अ॒भव॑न् । ये । ए॒वम् । वि॒द्वांसः॑ । ए॒ताः । आस॑न्ते । उ॒भय॑म्
। ए॒व । समि॑ति । वृ॒ञ्जते॑ । ब्रह्म॑ । च । अ॒न्नम् । च ।

TS 7.3.9.2

TS 7.3.9.2

Samhita Paata

ब्रह्म॑वर्च॒सिनो॑ऽन्ना॒दा भ॑वन्ति॒ द्वे वा ए॒ते वि॒राजौ॑ तयो॒रेव॑ नाना॒ प्रति॑ तिष्ठन्ति वि॒शो वै पुरु॑षो दश॒
हस्त्या॑ अ॒ङ्गुल॑यो दश॒ पद्मा॑ यावा॒नेव॑ पुरु॑षस्तमा॒त्वोत् तिष्ठ॑न्ति ज्योति॒र्गौरा॑युरिति॒ त्र्यहा॑ भ॑वन्ती॒यं
वा॒व ज्योति॑रन्तरि॒क्षं गौ॒रसा॑वायु॒रिमा॑ने॒व लो॒का-न॒भ्यारो॑हन्त्यभिपूर्वं त्र्यहा॑ भ॑वन्त्यभिपूर्वमे॒व सु॒वर्गं॑ -

[]

Pada Paata

ब्रह्मवर्चसिन् इति ब्रह्म - वर्चसिनः । अन्नादा इत्यन्न - अदाः । भवन्ति । द्वे इति । वै ।
 एते इति । विराजाविति वि-राजौ । तयोः । एव । नाना । प्रतीति । तिष्ठन्ति । विशः
 । वै । पुरुषः । दश । हस्त्याः । अङ्गुलयः । दश । पद्याः । यावान् । एव ।
 पुरुषः । तम् । आत्वा । उदिति । तिष्ठन्ति । ज्योतिः । गौः । आयुः । इति । त्र्यहा
 इति त्रि - अहाः । भवन्ति । इयम् । वाव । ज्योतिः । अन्तरिक्षम् । गौः । असौ ।
 आयुः । इमान् । एव । लोकान् । अभ्यारोहन्तीत्यभि - आरोहन्ति । अभिपूर्वमित्यभि - पूर्वम्
 । त्र्यहा इति त्रि - अहाः । भवन्ति । अभिपूर्वमित्यभि - पूर्वम् । एव । सुवर्गमिति सुवः - गम् ।

TS 7.3.9.3**TS 7.3.9.3****Samhita Paata**

लोकमभ्यारोहन्ति यदन्यतः पृष्ठानि स्युर्विविधः स्यान्मद्ध्ये पृष्ठानि भवन्ति सविवधत्वायौजो वै वीर्यं
 पृष्ठान्योज एव वीर्यं मद्ध्यतो दधते बृहद्-रथन्तराभ्यां यन्तीयं वाव रथन्तरमसौ बृहदाभ्यामेव यन्त्यथो
 अनयोरेव प्रति तिष्ठन्त्येते वै यस्स्याञ्जसायनी सुती ताभ्यामेव सुवर्गं लोकं यन्ति पराञ्चो वा एते
 सुवर्गं () लोकमभ्यारोहन्ति ये पराचीनानि पृष्ठान्युपयन्ति प्रत्यङ् त्र्यहो भवति प्रत्यवरूढ्या अथो
 प्रतिष्ठित्या उभयोल्लोकयोर् ऋद्धोत् तिष्ठन्त्यतिरात्रावभितो भवतो ब्रह्मवर्चस-स्यान्नाद्यस्य परिगृहीत्यै

॥

Pada Paata

लोकम् । अभ्यारोहन्तीत्यभि-आरोहन्ति । यत् । अन्यतः । पृष्ठानि । स्युः । विविधमिति
 वि - विवधम् । स्यात् । मद्ध्यै । पृष्ठानि । भवन्ति । सविवधत्वायेति सविवध - त्वाय
 । ओजः । वै । वीर्यम् । पृष्ठानि । ओजः । एव । वीर्यम् । मद्ध्यतः । दुधते ।
 बृहद्रथन्तराभ्यामिति बृहत् - रथन्तराभ्याम् । यन्ति । इयम् । वाव । रथन्तरमिति रथं -
 तरम् । असौ । बृहत् । आभ्याम् । एव । यन्ति । अथो इति । अनयोः । एव ।
 प्रतीतिं । तिष्ठन्ति । एते इति । वै । यस्स्यं । अञ्जसायनी इत्यञ्जसा - अयनी । सुती
 इति । ताभ्याम् । एव । सुवर्गमिति सुवः - गम् । लोकम् । यन्ति । पराञ्चः । वै ।
 एते । सुवर्गमिति सुवः - गम् () । लोकम् । अभ्यारोहन्तीत्यभि - आरोहन्ति । ये ।
 प्राचीनानि । पृष्ठानि । उपयन्तीत्युप - यन्ति । प्रत्यङ् । त्र्यह इति त्रि - अहः । भवति ।
 प्रत्यवरूढ्या इति प्रति - अवरूढ्यै । अथो इति । प्रतिष्ठित्या इति प्रति - स्थित्यै । उभयोः
 । लोकयोः । ऋद्धा । उदिति । तिष्ठन्ति । अतिरात्रावित्यति - रात्रौ । अभितः । भवतुः ।
 ब्रह्मवर्चसस्येति ब्रह्म - वर्चसस्यं । अन्नाद्यस्येत्यन्न - अद्यस्य । परिगृहीत्या इति परि - गृहीत्यै ॥

TS 7.3.10.1**TS 7.3.10.1****Samhita Paata**

अ॒सावा॑दि॒त्योऽस्मिन्॑ लो॒क आ॑सीत् तं दे॒वाः पृ॒ष्ठैः परि॑गृह्य सु॒वर्गं॑ लो॒कम॑गमयन् परै॑रवस्तात्
पर्य॑गृह्णन् दि॒वाकी॑र्त्येन सु॒वर्गे॑ लो॒के प्र॒त्य॑स्थापयन् परैः॑ प॒रस्ता॑त् पर्य॑गृह्णन् पृ॒ष्ठैरु॒पावा॑रोहन्त्स वा
अ॒सावा॑दि॒त्योऽमु॒ष्मिन्॑ लो॒के परै॑रुभयतः परि॑गृहीतो यत् पृ॒ष्ठानि॑ भव॑न्ति सु॒वर्गमे॒व तैर्लो॒कं य॑ज॑माना
यन्ति॑ परै॑रवस्तात् परि॑ गृह्णन्ति दि॒वाकी॑र्त्येन - []

Pada Paata

अ॒सौ । आ॒दि॒त्यः । अ॒स्मिन् । लो॒के । आ॑सीत् । तम् । दे॒वाः । पृ॒ष्ठैः । परि॑गृह्येति परि
- गृह्य॑ । सु॒वर्ग॑मिति सु॒वः - गम् । लो॒कम् । अ॒गम॑यन् । परैः॑ । अ॒वस्ता॑त् । परी॑ति ।
अ॒गृह्ण॑न् । दि॒वाकी॑र्त्येनेति दि॒वा - की॑र्त्येन । सु॒वर्ग॑ इति सु॒वः - गे । लो॒के । प्र॒तीति॑ ।
अ॒स्था॒पय॑न् । परैः॑ । प॒रस्ता॑त् । परी॑ति । अ॒गृह्ण॑न् । पृ॒ष्ठैः । उ॒पावा॑रोह॒न्नित्यु॑प - अ॒वा॒रोह॑न्
। सः । वै । अ॒सौ । आ॒दि॒त्यः । अ॒मुष्मि॑न् । लो॒के । परैः॑ । उ॒भय॑तः । परि॑गृहीत॒ इति॑
परि॑-गृहीतः । यत् । पृ॒ष्ठानि॑ । भव॑न्ति । सु॒वर्ग॑मिति सु॒वः - गम् । ए॒व । तैः । लो॒कम्
। य॑ज॑मानाः । य॒न्ति । परैः॑ । अ॒वस्ता॑त् । परी॑ति । गृह्ण॑न्ति । दि॒वाकी॑र्त्येनेति दि॒वा - की॑र्त्येन ।

TS 7.3.10.2

TS 7.3.10.2

Samhita Paata

सु॒वर्गे॑ लो॒के प्र॒ति ति॑ष्ठन्ति परैः॑ प॒रस्ता॑त् परि॑ गृह्णन्ति पृ॒ष्ठैरु॒पावा॑रोहन्ति यत् परै॑ प॒रस्ता॑न्न स्युः परा॑ञ्चः
सु॒वर्गा॑-ल्लो॒कान्निष्प॑द्येरन् यद॒वस्ता॑न्न स्युः प्र॒जा निर्द॑हेयुर॒भितो॑ दि॒वाकी॑र्त्यं पर॑स्सामानो भवन्ति सु॒वर्गं॑

ए॒वैनाँ॑ लो॒क उ॒भ॒यतः॑ परिं गृह्णन्ति॑ यज॑माना॒ वै दि॒वाकी॒र्त्यः॑ सं॒व॒थ्सुरः॑ पर॑स्सामानोऽभितो॑ दि॒वाकी॒र्त्यं॑
पर॑स्सामानो भवन्ति सं॒व॒थ्सुर ए॒वोभ॒यतः॑ - []

Pada Paata

सु॒व॒र्ग इति॑ सु॒वः-गे॑ । लो॒के । प्रती॑ति । ति॒ष्ठन्ति॑ । परैः॑ । प॒रस्ता॑त् । परी॑ति । गृह्णन्ति॑ ।
पृ॒ष्ठैः । उ॒पाव॑रोहन्तीत्यु॒प - अ॒व॑रोहन्ति । यत् । परैः॑ । प॒रस्ता॑त् । न । स्युः॑ । परा॑ञ्चः ।
सु॒व॒र्गादि॑ति सु॒वः - गा॒त् । लो॒कात् । निरि॑ति । प॒द्ये॒रु॒च् । यत् । अ॒वस्ता॑त् । न । स्युः॑
। प्र॒जा इति॑ प्र - जाः । निरि॑ति । दु॒हे॒युः । अ॒भितः॑ । दि॒वाकी॒र्त्यमि॑ति दि॒वा - की॒र्त्यम् ।
पर॑स्सामान इति परः॑ - सा॒मा॒नः । भ॒वन्ति॑ । सु॒व॒र्ग इति॑ सु॒वः - गे॑ । ए॒व । ए॒ना॒न् । लो॒के ।
उ॒भ॒यतः॑ । परी॑ति । गृह्णन्ति॑ । यज॑मानाः । वै । दि॒वाकी॒र्त्यमि॑ति दि॒वा - की॒र्त्यम् । सं॒व॒थ्सुर
इति॑ सं - व॒थ्सुरः॑ । पर॑स्सामान इति परः॑ - सा॒मा॒नः । अ॒भितः॑ । दि॒वाकी॒र्त्यमि॑ति दि॒वा -
की॒र्त्यम् । पर॑स्सामान इति परः॑ - सा॒मा॒नः । भ॒वन्ति॑ । सं॒व॒थ्सुर इति॑ सं - व॒थ्सुरे॑ । ए॒व ।
उ॒भ॒यतः॑ ।

TS 7.3.10.3

TS 7.3.10.3

Samhita Paata

प्रति॑ तिष्ठन्ति पृ॒ष्ठं वै दि॒वाकी॒र्त्यं पा॒र्श्वे पर॑स्सामानोऽभितो॑ दि॒वाकी॒र्त्यं पर॑स्सामानो भवन्ति
तस्मा॑द॒भितः॑ पृ॒ष्ठं पा॒र्श्वे भूयि॑ष्ठा ग्रहा॑ गृह्णन्ते भूयि॑ष्ठः शस्यते य॒ज्ञस्यै॒व तन्म॑द्भ्यतो ग्रन्थिं॑ ग्र॒न्थन्त्यवि॑स्रः॒साय॑

स॒प्त गृ॒ह्यन्ते स॒प्त वै शी॒र्ष॒ण्याः॑ प्रा॒णाः प्रा॒णाने॒व यज॑मानेषु दधति॒ यत् प॑रा॒चीना॑नि पृ॒ष्ठानि॒
भव॑न्त्यमु॒मेव तै॒-ल्लो॒कम॒भ्यारो॑हन्ति॒ यदि॑मं॒ लो॒कं न - []

Pada Paata

प्रती॑तिं । ति॒ष्ठन्ति॒ । पृ॒ष्ठम् । वै । दि॒वा॒की॒र्त्यमि॑तिं दि॒वा - की॒र्त्यम् । पा॒र्श्वे इति॑ । पर॑स्सामान् इति॒
परः॑ - सा॒मान् । अ॒भितः॑ । दि॒वा॒की॒र्त्यमि॑तिं दि॒वा - की॒र्त्यम् । पर॑स्सामान् इति॒ परः॑-सा॒मान् ।
। भ॒वन्ति॒ । तस्मा॑त् । अ॒भितः॑ । पृ॒ष्ठम् । पा॒र्श्वे इति॑ । भूयि॑ष्ठाः । ग्र॒हाः॑ । गृ॒ह्यन्ते । भूयि॑ष्ठम्
। श॒स्य॒ते । य॒ज्ञस्य॑ । ए॒व । तत् । म॒द्ध्य॒तः । ग्र॒न्थिम् । ग्र॒थन्ति॒ । अ॒वि॒स्र॒सा॒येत्य॑वि॒
- स्र॒सा॒य । स॒प्त । गृ॒ह्यन्ते । स॒प्त । वै । शी॒र्ष॒ण्याः॑ । प्रा॒णा इति॑ प्र - अ॒नाः ।
प्रा॒णानि॑तिं प्र - अ॒नान् । ए॒व । यज॑मानेषु । द॒धति॒ । यत् । प॑रा॒चीना॑नि । पृ॒ष्ठानि॒ । भ॒वन्ति॒ ।
अ॒मुम् । ए॒व । तैः । लो॒कम् । अ॒भ्यारो॑हन्तीत्य॑भि॒-आ॒रोह॑न्ति । यत् । इ॒मम् । लो॒कम् । न ।

TS 7.3.10.4

TS 7.3.10.4

Samhita Paata

प्र॒त्यव॑-रोहे॒युरु॒द्धा मा॒द्येयु॑र्यज॑मानाः प्र वा॑ मीये॒रन् यत् प्र॑ती॒चीना॑नि पृ॒ष्ठानि॒ भ॒वन्ती॑ममे॒व तै॒ल्लो॒कं
प्र॒त्यव॑रोह॒न्त्यथो॑ अ॒स्मिन्ने॒व लो॒के प्र॑ति॒ ति॒ष्ठन्त्यनु॑न्मादा॒येन्द्रो॑ वा अ॒प्रति॑ष्ठित आसी॒थ स प्र॑जाप॑ति॒-
मुपा॑धाव॒त् तस्मा॑ ए॒तमे॑कवि॒ंशति॑रा॒त्रं प्राय॑च्छ॒त् तमाऽह॑र॒त् तेना॑यज॒त् ततो॑ वै स प्र॒त्यति॑ष्ठ॒द्ये
ब॑हु॒याजिनो॑ ऽप्र॑ति॒ष्ठिताः॑ - []

Pada Paata

प्रत्यवरोहेयुरिति प्रति - अवरोहेयुः । उदिति । वा । माघेयुः । यजमानाः । प्रेति । वा । मीयेरन् । यत् । प्रतीचीनानि । पृष्ठानि । भवन्ति । इमम् । एव । तैः । लोकम् । प्रत्यवरोहन्तीति प्रति - अवरोहन्ति । अथो इति । अस्मिन् । एव । लोके । प्रतीति । तिष्ठन्ति । अनुन्मादायेत्यनुत् - मादाय । इन्द्रः । वै । अप्रतिष्ठित इत्यप्रति - स्थितः । आसीत् । सः । प्रजापतिमिति प्रजा-पतिम् । उपेति । अधावत् । तस्मै । एतम् । एकविंशतिरात्रमित्येकविंशति - रात्रम् । प्रेति । अयच्छत् । तम् । एति । अहरत् । तेन । अयजत् । ततः । वै । सः । प्रतीति । अतिष्ठत् । ये । बहुयाजिन इति बहु - याजिनः । अप्रतिष्ठिता इत्यप्रति - स्थिताः ।

TS 7.3.10.5**TS 7.3.10.5****Samhita Paata**

स्युस्त एकविंशति-रात्रमासीरन् द्वादश मासाः पञ्चवस्त्रय इमे लोका असावादित्य एकविंश एतावन्तो वै देवल्लोकास्तेष्वेव यथा पूर्वं प्रति तिष्ठन्त्यसावादित्यो न व्यरोचत स प्रजापतिमुपाधावत् तस्मा एतमेकविंशतिरात्रं प्रायच्छत् तमाऽहरत् तेनायजत् ततो वै सोऽरोचत य एवं विद्वांस एकाविंशतिरात्रमासंते () रोचन्त एवैकविंशतिरात्रो भवति रुग्वा एकविंशो रुचमेव गच्छन्त्यथो प्रतिष्ठामेव प्रतिष्ठा ह्येकविंशोऽतिरात्रावभितो भवतो ब्रह्मवर्चसस्य परिगृहीत्यै ॥

Pada Paata

स्युः । ते । एक॒वि॒श॒तिरा॒त्रमि॒त्येक॒वि॒श॒ति - रा॒त्रम् । आ॒सी॒र॒न् । द्वा॒द॒श । मा॒साः । प॒ञ्च । ऋ॒त॒वः । त्र॒यः । इ॒मे । लो॒काः । अ॒सौ । आ॒दि॒त्यः । एक॒वि॒श॒ इत्ये॒क - वि॒शः । ए॒ताव॑न्तः । वै । दे॒वलो॒का इति॑ दे॒व - लो॒काः । तेषु॑ । ए॒व । य॒थापू॒र्वमि॒ति यथा॑ - पू॒र्वम् । प्र॒तीति॑ । ति॒ष्ठन्ति॑ । अ॒सौ । आ॒दि॒त्यः । न । वी॒ति । अ॒रोच॑त् । सः । प्र॒जाप॑तिमि॒ति प्र॒जा - प॒तिम् । उ॒पेति॑ । अ॒धाव॑त् । तस्मै॑ । ए॒तम् । एक॒वि॒श॒तिरा॒त्रमि॒त्येक॒वि॒श॒ति - रा॒त्रम् । प्रेति॑ । अ॒यच्छ॑त् । तम् । ए॒ति । अ॒ह॒रत् । तेन॑ । अ॒यज॑त् । ततः॑ । वै । सः । अ॒रोच॑त् । ये । ए॒वम् । वि॒द्वा॒सः । एक॒वि॒श॒तिरा॒त्रमि॒त्येक॒वि॒श॒ति - रा॒त्रम् । आ॒स॒ते () । रोच॑न्ते । ए॒व । एक॒वि॒श॒तिरा॒त्र इत्ये॒कवि॒श॒ति - रा॒त्रः । भ॒व॒ति । रुक् । वै । एक॒वि॒श॒ इत्ये॒क - वि॒शः । रुच॑म् । ए॒व । ग॒च्छन्ति॑ । अथो॑ इति॑ । प्र॒तिष्ठा॑मि॒ति प्रति॑ - स्था॒म् । ए॒व । प्र॒तिष्ठे॑ति॒ प्रति॑ - स्था । हि । एक॒वि॒श॒ इत्ये॒क - वि॒शः । अ॒तिरा॒त्रावि॒त्यति॑ - रा॒त्रौ । अ॒भि॒तः । भ॒व॒तः । ब्र॒ह्मव॑र्च॒सस्ये॑ति॒ ब्रह्म॑ - व॒र्च॒सस्य॑ । परि॑गृही॒त्या इति॑ परि॑ - गृही॒त्यै ॥

TS 7.3.11.1**TS 7.3.11.1****Samhita Paata**

अ॒र्वाङ् य॒ज्ञः सं क्रा॑म॒त्वमुष्मा॑दधि॒ माम॒भि । ऋ॒षीणां॑ यः पु॒रोहि॑तः ॥ नि॒र्दे॒वं नि॒र्वी॒रं कृ॒त्वा विष्क॑न्धं॒ तस्मिन्॑ ही॒यतां॑ योऽस्मा॑न् द्वेष्टि॑ । शरी॑रं य॒ज्ञश॑म॒लं कु॒सीदुं॑ तस्मिन्॑ श्सी॒दतु॑ योऽस्मा॑न् द्वेष्टि॑ ॥ य॒ज्ञं य॒ज्ञस्य॑ यत् ते॒जस्ते॑न॒ संक्रा॑म॒ माम॒भि । ब्रा॒ह्म॒णानृ॒त्विजो॑ दे॒वान् य॒ज्ञस्य॑ तप॑सा ते स॒वा॒ह॒मा

हुवे ॥ इष्टेन पृक्मुप - []

Pada Paata

अ॒र्वाङ् । य॒ज्ञः । स॒मि॒तिं । क्रा॒म॒तु । अ॒मुष्मा॑त् । अधी॑ति । मा॒म् । अ॒भि ॥ ऋ॒षी॑णाम्
 । यः । पु॒रोहि॑त् इति॑ पु॒रः - हि॒तः ॥ नि॒दे॒व॒मि॒ति॒ निः - दे॒वम् । नि॒र्वी॒र॒मि॒ति॒ निः - वी॒रम्
 । कृ॒त्वा । वि॒ष्क॑न्ध॒मि॒ति॒ वि - स्क॑न्धम् । तस्मि॑न् । ही॒य॒ता॒म् । यः । अ॒स्मान् । द्वेष्टि॑ ॥
 शरी॑रम् । य॒ज्ञश॑म॒लमि॑ति॒ यज्ञ - श॑म॒लम् । कु॒सी॑दम् । तस्मि॑न् । सी॒द॒तु । यः । अ॒स्मान् ।
 द्वेष्टि॑ ॥ य॒ज्ञ । य॒ज्ञस्य॑ । यत् । तेजः॑ । तेन॑ । स॒मि॒तिं । क्रा॒म॒ । मा॒म् । अ॒भि ॥ ब्रा॒ह्म॒णान्
 । ऋ॒त्विजः॑ । दे॒वान् । य॒ज्ञस्य॑ । तप॑सा । ते । स॒व॒ । अ॒हम् । ए॒ति॒ । हु॒वे ॥ इ॒ष्टेन॑ ।
 पृ॒क्म् । उ॒पेति॑ ।

TS 7.3.11.2

TS 7.3.11.2

Samhita Paata

ते हुवे सवा॒हं । सं ते वृ॒ञ्जे सु॒कृ॒तः सं प्र॒जां प॒शून् ॥ प्रै॒षान्ध्र॑-सा॒मि॒धेनी॑-रा॒घा॒रावा॒ज्य॑भा॒गावा॑-श्रु॒तं
 प्र॒त्याश्रु॑त॒मा श्रृ॑णामि ते । प्र॒या॒जा॒नू॒या॒जान्ध्र॑-स्वि॒ष्ट॒कृ॒त॒मि॒डा॒मा॒शि॒ष आ वृ॒ञ्जे सु॒वः ॥ अ॒ग्नि॒ने॒न्द्रेण॑
 सोमे॑न॒ सर॑स्व॒त्या वि॒ष्णु॑ना दे॒वता॑भिः । या॒ज्या॒नु॒वा॒क्या॑भ्या॒मुप॑ ते हुवे सवा॒हं य॒ज्ञमा द॑दे ते वष॑ट्कृतं
 ॥ स्तु॒तः श॒स्त्रं प्र॑ति॒ग॒रं ग्र॒ह॒मि॒डा॒मा॒शि॒ष - []

Pada Paata

ते । हुवे । सव । अहम् ॥ समिति । ते । वृञ्जे । सुकृतमिति सु - कृतम् । समिति । प्रजामिति
 प्र - जाम् । पशून् ॥ प्रैषानिति प्र - एषान् । समिधेनीरिति सां - इधेनीः । आघारावित्या -
 घारौ । आज्यभागावित्याज्य - भागौ । आश्रुतमित्या - श्रुतम् । प्रत्याश्रुतमिति प्रति - आश्रुतम्
 । एति । शृणामि । ते ॥ प्रयाजानूयाजानिति प्रयाज - अनूयाजान् । स्विष्टकृतमिति स्विष्ट -
 कृतम् । इडाम् । आशिष इत्या - शिषः । एति । वृञ्जे । सुवः ॥ अग्निना । इन्द्रेण । सोमेन
 । सरस्वत्या । विष्णुना । देवताभिः ॥ याज्यानुवाक्याभ्यामिति याज्या - अनुवाक्याभ्याम् ।
 उपेति । ते । हुवे । सव । अहम् । यज्ञम् । एति । ददे । ते । वर्षद्वृतमिति वर्षट् - कृतम्
 ॥ स्तुतम् । शस्त्रम् । प्रतिगरमिति प्रति - गरम् । ग्रहम् । इडाम् । आशिष इत्या - शिषः ।

TS 7.3.11.3**TS 7.3.11.3****Samhita Paata**

आ वृञ्जे सुवः । पत्नीसंयाजानुपं ते हुवे सवाहः समिष्टयजुरा ददे तव ॥ पशून्थ-सुतं पुरोडाशान्थ-
 सवनान्योत यज्ञं । देवान्थ-सेन्द्रानुपं ते हुवे सवाह-मग्निमुखान्थ-सोमवतो ये च विश्वे ॥

Pada Paata

एति । वृञ्जे । सुवः ॥ पत्नीसंयाजानिति पत्नी-संयाजान् । उपेति । ते । हुवे । सव । अहम्

। समिष्टयजुरिति॑ समिष्ट - यजुः । एति॑ । ददे॑ । तव॑ ॥ पशून् । सुतम् । पुरोडाशान् ।
सर्व॑नानि । एति॑ । उ॒त । य॒ज्ञम् ॥ दे॒वान् । सेन्द्रा॑निति॒ स-इन्द्रा॑न् । उपेति॑ । ते । हु॒वे ।
स॒व । अ॒हम् । अ॒ग्निमु॑खा॒नित्य॑ग्नि - मु॒खा॒न् । सोम॑व॒त इति॑ सोम॑-व॒तः । ये । च॒ । वि॒श्वे ॥

TS 7.3.12.1

TS 7.3.12.1

Samhita Paata

भू॒तं भ॒व्यं भ॒विष्य॑द्वष॒ट्थ॒ स्वाहा॑ नम॒ ऋ॒क् साम॑ यजु॒र्वष॑ट्थ॒ स्वाहा॑ नमो॑ गाय॒त्री त्रि॒ष्टुब् जग॑ती
वष॒ट्थ॒ स्वाहा॑ नमः॑ पृ॒थि॒व्यन्त॑रि॒क्षं द्यौ॑ र्वष॒ट्थ॒ स्वाहा॑ नमो॑ ऽग्नि॒र्वा॒युः सूर्यो॑ वष॒ट्थ॒ स्वाहा॑ नमः॑
प्रा॒णो-व्या॒नो-ऽपा॒नो वष॑ट्थ॒ स्वाहा॑ नमो॑ ऽन्नं॑ कृ॒षि-वृ॑ष्टि॒र्वष॑ट्थ॒ स्वाहा॑ नमः॑ पि॒तापु॑त्रः पौ॒त्रो वष॑ट्थ॒
स्वाहा॑ नमो॑ भूर्भु॒वः () सु॒व र्वष॑ट्थ॒ स्वाहा॑ नमः॑ ॥

Pada Paata

भू॒तम् । भ॒व्यम् । भ॒विष्य॑त् । वष॑ट् । स्वाहा॑ । नमः॑ । ऋ॒क् । साम॑ । यजुः॑ । वष॑ट्
। स्वाहा॑ । नमः॑ । गाय॒त्री । त्रि॒ष्टुप् । जग॑ती । वष॑ट् । स्वाहा॑ । नमः॑ । पृ॒थि॒वी ।
अ॒न्त॑रि॒क्षम् । द्यौः॑ । वष॑ट् । स्वाहा॑ । नमः॑ । अ॒ग्निः । वा॒युः । सूर्यः॑ । वष॑ट् ।
स्वाहा॑ । नमः॑ । प्रा॒ण इति॑ प्र - अ॒नः । व्या॒न इति॑ वि - अ॒नः । अ॒पा॒न इत्य॑प-अ॒नः ।
वष॑ट् । स्वाहा॑ । नमः॑ । अ॒न्नम् । कृ॒षिः । वृ॑ष्टिः । वष॑ट् । स्वाहा॑ । नमः॑ । पि॒ता ।
पु॒त्रः । पौ॒त्रः । वष॑ट् । स्वाहा॑ । नमः॑ । भूः । भु॒वः () । सु॒वः । वष॑ट् । स्वाहा॑ । नमः॑ ॥

TS 7.3.13.1

TS 7.3.13.1

Samhita Paata

आ मे॑ गृहा भव॑न्त्वा प्र॒जा म॒ आ मा॑ य॒ज्ञो वि॑शतु वी॒र्या॑वान् । आपो॑ दे॒वीर्य॑ज्ञिया॒ माऽऽवि॑शन्तु
स॒हस्र॑स्य मा भू॒मा मा प्र॑ हा॒सीत् ॥ आ मे॑ ग्र॒हो भव॑त्वा पु॒रोरु॑ख् स्तु॒तश॑स्त्रे मा ऽऽ वि॑शताऽ
स॒मीची॑ । आ॒दित्या॑ रु॒द्रा वस॑वो मे सद॒स्याः" स॒हस्र॑स्य मा भू॒मा मा प्र॑ हा॒सीत् ॥ आ मा॑ऽग्नि॒ष्टोमो॑
वि॑शतू () कथ्य॑श्चाति॒रात्रो॑ माऽऽ वि॑शत्वापि॒शर्व॑रः । ति॒रोअ॑ह्निया॒ मा सु॒हुता॑ आ वि॑शन्तु स॒हस्र॑स्य
मा भू॒मा मा प्र॑ हा॒सीत् ॥

Pada Paata

एति॑ । मे॑ । गृहाः॑ । भव॑न्तु । एति॑ । प्र॒जेति॑ प्र - जा । मे॑ । एति॑ । मा॒ । य॒ज्ञः । वि॑शतु ।
वी॒र्या॑वानिति॑ वी॒र्य - वा॒न् ॥ आपः॑ । दे॒वीः । य॒ज्ञियाः" । मा॒ । एति॑ । वि॑शन्तु । स॒हस्र॑स्य ।
मा॒ । भू॒मा । मा । प्रेति॑ । हा॒सीत् ॥ एति॑ । मे॑ । ग्र॒हः । भव॑तु । एति॑ । पु॒रोरु॑गिति॑ पुरः -
रुक् । स्तु॒तश॑स्त्रे इति॑ स्तुत - श॒स्त्रे । मा॒ । एति॑ । वि॑शताम् । स॒मीची॑ इति॑ ॥ आ॒दित्याः॑ ।
रु॒द्राः । वस॑वः । मे॑ । सद॒स्याः" । स॒हस्र॑स्य । मा॒ । भू॒मा । मा । प्रेति॑ । हा॒सीत् ॥ एति॑ ।
मा॒ । अ॒ग्नि॒ष्टोम॑ इत्य॑ग्नि - स्तो॒मः । वि॑शतु () । उ॒क्थ्यः॑ । च॒ । अ॒ति॒रात्र॑ इत्य॑ति - रा॒त्रः ।
मा॒ । एति॑ । वि॑शतु । आ॒पि॒शर्व॑र इत्या॑पि - शर्व॑रः ॥ ति॒रोअ॑ह्निया॒ इति॑ ति॒रः - अ॒ह्नियाः॑ । मा॒
। सु॒हुता॑ इति॑ सु - हु॒ताः । एति॑ । वि॑शन्तु । स॒हस्र॑स्य । मा॒ । भू॒मा । मा । प्रेति॑ । हा॒सीत् ॥

TS 7.3.14.1

TS 7.3.14.1

Samhita Paata

अ॒ग्निना॑ तपोऽन्व॑भवद्-वा॒चा ब्र॒ह्म म॒णिना॑ रू॒पाणीन्द्रे॑ण दे॒वान् वा॒तेन॑ प्रा॒णान्थ॑ सू॒र्येण॑ द्यां च॒न्द्रम॑सा
नक्ष॑त्राणि य॒मेन॑ पि॒तृन् रा॒ज्ञां म॒नुष्या॑न् फ॒लेन॑ नादे॒यान॑ज॒गरे॑ण॒ सर्पा॑न् व्या॒घ्रेणा॑ऽऽ*र॒ण्यान् प॒शूञ्छ्ये॑नेन॒
प॒त॒त्रिणो॑ वृ॒ष्णाऽश्वा॑नृ॒षभे॑ण॒ गा ब॒स्तेना॒जा वृ॒ष्णिना॑ऽवी॒र्व्रीहि॑णाऽन्ना॒नि यवे॑नौष॒धीन्य॑ग्रोधे॒न व॒नस्प॑तीनु॒दुब॑रे॒णोर्जं॑
गाय॒त्रिया॑ छ॒न्दाश्सि॑ त्रि॒वृता॑ स्तो॒मांन् ब्रा॒ह्मणे॑न् () वाचं॑ ॥

Pada Paata

अ॒ग्निना॑ । तपः॑ । अ॒न्विति॑ । अ॒भ॒वत् । वा॒चा । ब्र॒ह्म । म॒णिना॑ । रू॒पाणि॑ । इन्द्रे॑ण । दे॒वान्
। वा॒तेन॑ । प्रा॒णानिति॑ प्र - अ॒नान् । सू॒र्येण॑ । द्याम् । च॒न्द्रम॑सा । नक्ष॑त्राणि । य॒मेन॑ । पि॒तृन्
। रा॒ज्ञां । म॒नुष्या॑न् । फ॒लेन॑ । नादे॒यान् । अ॒ज॒गरे॑ण॒ सर्पा॑न् । व्या॒घ्रेण॑ । आ॒र॒ण्यान् । प॒शून्
। श्ये॑नेन॒ । प॒त॒त्रिणः॑ । वृ॒ष्णां । अ॒श्वा॑न् । ऋ॒षभे॑ण॒ गाः । ब॒स्तेन॑ । अ॒जाः । वृ॒ष्णिना॑
। अ॒वीः । व्री॒हिणा॑ । अ॒न्ना॒नि । यवे॑न । ओष॒धीः । न्य॒ग्रोधे॑न । व॒नस्प॑तीन् । उ॒दु॒म्बरे॑ण
। ऊ॒र्जम् । गा॒य॒त्रिया॑ । छ॒न्दाश्सि॑ । त्रि॒वृतेति॑ त्रि - वृ॒तां । स्तो॒मान् । ब्रा॒ह्मणे॑न् () । वाचं॑ ॥

TS 7.3.15.1**TS 7.3.15.1****Samhita Paata**

स्वाहाऽऽधिमा॑धी॒ताय॒ स्वाहा॒ स्वाहाऽऽधी॑तुं॒ मन॑से॒ स्वाहा॒ स्वाहा॒ मनः॑ प्र॒जाप॑तये॒ स्वाहा॒ काय॒ स्वाहा॒
 कस्मै॑ स्वाहा॑ क॒त॒मस्मै॑ स्वाहा॑ ऽदि॒त्यै स्वाहा॑ ऽदि॒त्यै म॒ह्यै स्वाहा॑ऽदि॒त्यै सु॒मृ॒डीका॑यै॒ स्वाहा॑ सर॑स्वत्यै॒
 स्वाहा॑ सर॑स्वत्यै बृ॒ह॒त्यै स्वाहा॑ सर॑स्वत्यै पा॒व॒कायै॑ स्वाहा॑ पू॒ष्णे स्वाहा॑ पू॒ष्णे प्र॑प॒थ्याय॑ स्वाहा॑ पू॒ष्णे
 न॒र॒न्धि॑षाय॒ स्वाहा॑ त्वष्ट्रे॑ स्वाहा॑ त्वष्ट्रे॑ तु॒रीपा॑य॒ स्वाहा॑ त्वष्ट्रे॑ पु॒रु॒रूपा॑य॒ स्वाहा॑ () वि॒ष्णवे॑ स्वाहा॑
 वि॒ष्णवे॑ नि॒खुर्य॑पाय॒ स्वाहा॑ वि॒ष्णवे॑ नि॒भूय॑पाय॒ स्वाहा॑ सर्व॑स्मै॒ स्वाहा॑ ॥

Pada Paata

स्वाहा॑ । आ॒धि॒मि॒त्या - धि॒म् । आ॒धी॒ता॒ये॒त्या - धी॒ता॒य॒ । स्वाहा॑ । स्वाहा॑ । आ॒धी॒त॒मि॒त्या -
 धी॒त॒म् । मन॑से॒ । स्वाहा॑ । स्वाहा॑ । मनः॑ । प्र॒जाप॑तय॒ इति॑ प्र॒जा - प॒त॒ये॒ । स्वाहा॑ । काय॑ ।
 स्वाहा॑ । कस्मै॑ । स्वाहा॑ । क॒त॒मस्मै॑ । स्वाहा॑ । अ॒दि॒त्यै । स्वाहा॑ । अ॒दि॒त्यै । म॒ह्यै । स्वाहा॑
 । अ॒दि॒त्यै । सु॒मृ॒डीका॑या॒ इति॑ सु - मृ॒डीका॑यै॒ । स्वाहा॑ । सर॑स्वत्यै । स्वाहा॑ । सर॑स्वत्यै ।
 बृ॒ह॒त्यै । स्वाहा॑ । सर॑स्वत्यै । पा॒व॒कायै॑ । स्वाहा॑ । पू॒ष्णे । स्वाहा॑ । पू॒ष्णे । प्र॑प॒थ्याये॑ति
 प्र॒प॒थ्याय॑ । स्वाहा॑ । पू॒ष्णे । न॒र॒न्धि॑षाय॒ । स्वाहा॑ । त्वष्ट्रे॑ । स्वाहा॑ । त्वष्ट्रे॑ । तु॒रीपा॑य॒ । स्वाहा॑
 । त्वष्ट्रे॑ । पु॒रु॒रूपा॑येति॑ पु॒रु - रूपा॑य॒ । स्वाहा॑ () । वि॒ष्णवे॑ । स्वाहा॑ । वि॒ष्णवे॑ । नि॒खुर्य॑पायेति॑
 नि॒खुर्य॑ - पाय॑ । स्वाहा॑ । वि॒ष्णवे॑ । नि॒भूय॑पायेति॑ नि॒भूय॑ - पाय॑ । स्वाहा॑ । सर्व॑स्मै॒ । स्वाहा॑ ॥

TS 7.3.16.1**TS 7.3.16.1****Samhita Paata**

दुद्ध्यः स्वाहा हनू॑भ्याः स्वाहो॑ष्ठाभ्याः स्वाहा मुखा॑य स्वाहा नासिका॑भ्याः स्वाहा ऽक्षी॑भ्याः स्वाहा कर्णा॑भ्याः स्वाहा पा॒र इक्षवो॑ऽवा॒र्येभ्यः पक्ष्म॑भ्यः स्वाहा ऽवा॒र इक्षवः पा॒र्येभ्यः पक्ष्म॑भ्यः स्वाहा शी॒र्ष्णे स्वाहा॑ भ्रू॒भ्याः स्वाहा ल॒लाटा॑य स्वाहा मू॒र्ध्ने स्वाहा म॒स्तिष्का॑य स्वाहा केशो॑भ्यः स्वाहा वहा॑य स्वाहा ग्री॒वाभ्यः स्वाहा॑ स्क॒न्धेभ्यः स्वाहा की॒कसा॑भ्यः स्वाहा पृ॒ष्ठीभ्यः स्वाहा पा॒ज॒स्याय॑ स्वाहा पा॒र्श्वाभ्याः स्वाहा- []

Pada Paata

दुद्ध्य इति दत् - भ्यः । स्वाहा॑ । हनू॑भ्यामिति हनु - भ्याम् । स्वाहा॑ । ओष्ठा॑भ्याम् । स्वाहा॑ । मुखा॑य । स्वाहा॑ । नासिका॑भ्याम् । स्वाहा॑ । अक्षी॑भ्याम् । स्वाहा॑ । कर्णा॑भ्याम् । स्वाहा॑ । पा॒रे । इक्षवः । अ॒वा॒र्येभ्यः । पक्ष्म॑भ्य इति पक्ष्म - भ्यः । स्वाहा॑ । अ॒वा॒रे । इक्षवः । पा॒र्येभ्यः । पक्ष्म॑भ्य इति पक्ष्म - भ्यः । स्वाहा॑ । शी॒र्ष्णे । स्वाहा॑ । भ्रू॒भ्याम् । स्वाहा॑ । ल॒लाटा॑य । स्वाहा॑ । मू॒र्ध्ने । स्वाहा॑ । म॒स्तिष्का॑य । स्वाहा॑ । केशो॑भ्यः । स्वाहा॑ । वहा॑य । स्वाहा॑ । ग्री॒वाभ्यः । स्वाहा॑ । स्क॒न्धेभ्यः । स्वाहा॑ । की॒कसा॑भ्यः । स्वाहा॑ । पृ॒ष्ठीभ्य इति पृ॒ष्टि - भ्यः । स्वाहा॑ । पा॒ज॒स्याय॑ । स्वाहा॑ । पा॒र्श्वाभ्याम् । स्वाहा॑ ।

TS 7.3.16.2**TS 7.3.16.2****Samhita Paata**

ऽ॒सौ॑भ्या॒ः स्वाहा॑ दो॒षभ्या॑ः स्वाहा॑ बा॒हुभ्या॑ः स्वाहा॑ जङ्घा॑भ्या॒ः स्वाहा॑ श्रोणी॑भ्या॒ः स्वाहो॑रुभ्या॒ः
 स्वाहा॑ ऽष्ठी॒वद्भ्या॑ः स्वाहा॑ जङ्घा॑भ्या॒ः स्वाहा॑ भु॒सदे॑ स्वाहा॑ शिख॑ण्डेभ्यः स्वाहा॑ वाल॒धाना॑य स्वाहा॑
 ऽऽण्डा॑भ्या॒ः स्वाहा॑ शेपा॑य स्वाहा॑ रेत॑से स्वाहा॑ प्र॒जाभ्यः॑ स्वाहा॑ प्र॒जन॑नाय स्वाहा॑ प॒द्भ्यः॑ स्वाहा॑
 शु॒फेभ्यः॑ स्वाहा॑ लोम॑भ्यः स्वाहा॑ त्व॒चे स्वाहा॑ लोहि॑ताय स्वाहा॑ मा॒ऽसा॑य स्वाहा॑ स्ना॒वभ्यः॑ स्वाहा॑
 ऽस्थ॑भ्यः स्वाहा॑ म॒ज्जभ्यः॑ स्वाहा॑ () ऽङ्गे॑भ्यः स्वाहा॑ ऽऽत्म॑ने स्वाहा॑ सर्व॑स्मै स्वाहा॑ ॥

Pada Paata

अ॒सौ॑भ्याम् । स्वाहा॑ । दो॒षभ्या॑मिति॑ दोष - भ्याम् । स्वाहा॑ । बा॒हुभ्या॑मिति॑ बाहु - भ्याम् ।
 स्वाहा॑ । जङ्घा॑भ्याम् । स्वाहा॑ । श्रोणी॑भ्यामिति॑ श्राणि - भ्याम् । स्वाहा॑ । ऊ॒रुभ्या॑मित्यू॒रु -
 भ्याम् । स्वाहा॑ । अ॒ष्ठी॒वद्भ्या॑मित्य॑ष्ठी॒वत् - भ्याम् । स्वाहा॑ । जङ्घा॑भ्याम् । स्वाहा॑ । भु॒सदे॑
 । स्वाहा॑ । शिख॑ण्डेभ्यः । स्वाहा॑ । वाल॒धाना॑येति॑ वाल - धानाय । स्वाहा॑ । अ॒ण्डा॑भ्याम्
 । स्वाहा॑ । शेपा॑य । स्वाहा॑ । रेत॑से । स्वाहा॑ । प्र॒जाभ्य॑ इति॑ प्र - जाभ्यः । स्वाहा॑ ।
 प्र॒जन॑नायेति॑ प्र - जननाय । स्वाहा॑ । प॒द्भ्यः॑ इति॑ पत् - भ्यः । स्वाहा॑ । शु॒फेभ्यः॑ । स्वाहा॑
 । लोम॑भ्य इति॑ लोम - भ्यः । स्वाहा॑ । त्व॒चे । स्वाहा॑ । लोहि॑ताय । स्वाहा॑ । मा॒ऽसा॑य ।
 स्वाहा॑ । स्ना॒वभ्य॑ इति॑ स्नाव - भ्यः । स्वाहा॑ । अ॒स्थ॑भ्य इत्य॑स्थ - भ्यः । स्वाहा॑ । म॒ज्जभ्य॑
 इति॑ म॒ज्ज - भ्यः । स्वाहा॑ () । अ॒ङ्गे॑भ्यः । स्वाहा॑ । आ॒त्म॑ने । स्वाहा॑ । सर्व॑स्मै । स्वाहा॑ ॥

TS 7.3.17.1**TS 7.3.17.1****Samhita Paata**

अ॒ञ्ज्ये॒ताय॑ स्वाहा॑ ऽञ्जिसु॒क्थाय॑ स्वाहा॑ शि॒तिप॑दे स्वाहा॑ शि॒तिक॑कु॒दे स्वाहा॑ शि॒तिर॑न्ध्रा॒य स्वाहा॑
 शि॒तिपृ॑ष्ठा॒य स्वाहा॑ शि॒त्य॑ऽसा॒य स्वाहा॑ पु॒ष्प॒कर्णा॑य॒ स्वाहा॑ शि॒त्यो॑ष्ठा॒य स्वाहा॑ शि॒तिभ्र॑वे स्वाहा॑
 शि॒तिभ॑स॒दे स्वाहा॑ श्वे॒तानू॑का॒शाय॑ स्वाहा॑ ऽञ्ज्ये॒ स्वाहा॑ ल॒लामा॑य॒ स्वाहा॑ ऽसि॑त॒श्च स्वाहा॑ कृ॒ष्णै॒ताय॑
 स्वाहा॑ रो॒हितै॑ता॒य स्वाहा॑ ऽरु॒णै॒ताय॑ स्वाहे॒दृशा॑य॒ स्वाहा॑ की॒दृशा॑य॒ स्वाहा॑ ता॒दृशा॑य॒ स्वाहा॑ स॒दृशा॑य॒
 स्वाहा॑ वि॒स॒दृशा॑य॒ स्वाहा॑ सु॒स॒दृशा॑य॒ स्वाहा॑ रू॒पाय॑ स्वाहा॑ () सर्व॑स्मै स्वाहा॑ ॥

Pada Paata

अ॒ञ्ज्ये॒तायेत्य॑ञ्जि - ए॒ताय॑ । स्वाहा॑ । अ॒ञ्जिसु॒क्थायेत्य॑ञ्जि-सु॒क्थाय॑ । स्वाहा॑ । शि॒तिप॑दु इति॑
 शि॒ति - प॑दे । स्वाहा॑ । शि॒तिक॑कु॒दु इति॑ शि॒ति - कु॑कु॒दे । स्वाहा॑ । शि॒तिर॑न्ध्रा॒येति॑ शि॒ति - र॑न्ध्रा॒य
 । स्वाहा॑ । शि॒तिपृ॑ष्ठा॒येति॑ शि॒ति - पृ॑ष्ठा॒य । स्वाहा॑ । शि॒त्य॑ऽसा॒येति॑ शि॒ति - अ॑ऽसा॒य । स्वाहा॑
 । पु॒ष्प॒कर्णा॑येति॑ पु॒ष्प - क॑र्णा॒य । स्वाहा॑ । शि॒त्यो॑ष्ठा॒येति॑ शि॒ति - ओ॑ष्ठा॒य । स्वाहा॑ । शि॒तिभ्र॑व
 इति॑ शि॒ति - भ्र॑वे । स्वाहा॑ । शि॒तिभ॑स॒दु इति॑ शि॒ति - भ॑स॒दे । स्वाहा॑ । श्वे॒तानू॑का॒शयेति॑ श्वे॒त
 - अ॒नूका॑श॒ाय । स्वाहा॑ । अ॒ञ्ज्ये॒ । स्वाहा॑ । ल॒लामा॑य॒ । स्वाहा॑ । अ॒सि॑त॒श्च इत्य॑सि॒त - श्च॑वे
 । स्वाहा॑ । कृ॒ष्णै॒तायेति॑ कृ॒ष्ण - ए॒ताय॑ । स्वाहा॑ । रो॒हितै॑ता॒येति॑ रो॒हित - ए॒ताय॑ । स्वाहा॑ ।
 अ॒रु॒णै॒तायेत्य॑रु॒ण - ए॒ताय॑ । स्वाहा॑ । ई॒दृशा॑य॒ । स्वाहा॑ । की॒दृशा॑य॒ । स्वाहा॑ । ता॒दृशा॑य॒ ।
 स्वाहा॑ । स॒दृशा॑य॒ । स्वाहा॑ । वि॒स॒दृशा॑येति॑ वि॒स॒दृशा॑य॒ । स्वाहा॑ । सु॒स॒दृशा॑येति॑ सु॒ - स॒दृशा॑य॒
 । स्वाहा॑ । रू॒पाय॑ । स्वाहा॑ () । सर्व॑स्मै । स्वाहा॑ ॥

TS 7.3.18.1**TS 7.3.18.1****Samhita Paata**

कृष्णाय॑ स्वाहा॑ श्वे॒ताय॑ स्वाहा॑ पि॒शङ्गाय॑ स्वाहा॑ सा॒रङ्गाय॑ स्वाहा॑ ऽरु॒णाय॑ स्वाहा॑ गौ॒राय॑ स्वाहा॑
 ब॒भ्रवे॑ स्वाहा॑ न॒कुलाय॑ स्वाहा॑ रोहि॑ताय॑ स्वाहा॑ शो॒णाय॑ स्वाहा॑ श्या॒वाय॑ स्वाहा॑ श्या॒माय॑ स्वाहा॑
 पा॒क॒लाय॑ स्वाहा॑ सु॒रूपाय॑ स्वाहा॑ अ॒नुरू॑पाय॑ स्वाहा॑ वि॒रूपाय॑ स्वाहा॑ स॒रूपाय॑ स्वाहा॑ प्र॒तिरू॑पाय॑
 स्वाहा॑ श॒बलाय॑ स्वाहा॑ क॒म॒लाय॑ स्वाहा॑ पृ॒श्नये॑ स्वाहा॑ पृ॒श्नि॒स॒क्थाय॑ स्वाहा॑ स॒र्वस्मै॑ स्वाहा॑ ॥

Pada Paata

कृष्णाय॑ । स्वाहा॑ । श्वे॒ताय॑ । स्वाहा॑ । पि॒शङ्गाय॑ । स्वाहा॑ । सा॒रङ्गाय॑ । स्वाहा॑ । अ॒रु॒णाय॑
 । स्वाहा॑ । गौ॒राय॑ । स्वाहा॑ । ब॒भ्रवे॑ । स्वाहा॑ । न॒कुलाय॑ । स्वाहा॑ । रोहि॑ताय॑ । स्वाहा॑
 । शो॒णाय॑ । स्वाहा॑ । श्या॒वाय॑ । स्वाहा॑ । श्या॒माय॑ । स्वाहा॑ । पा॒क॒लाय॑ । स्वाहा॑ ।
 सु॒रूपायेति॑ सु - रू॒पाय॑ । स्वाहा॑ । अ॒नुरू॑पायेत्यनु॑ - रू॒पाय॑ । स्वाहा॑ । वि॒रूपायेति॑ वि-रू॒पाय॑
 । स्वाहा॑ । स॒रूपायेति॑ स-रू॒पाय॑ । स्वाहा॑ । प्र॒तिरू॑पायेति॑ प्र॒ति - रू॒पाय॑ । स्वाहा॑ । श॒बलाय॑
 । स्वाहा॑ । क॒म॒लाय॑ । स्वाहा॑ । पृ॒श्नये॑ । स्वाहा॑ । पृ॒श्नि॒स॒क्थायेति॑ पृ॒श्नि - स॒क्थाय॑ । स्वाहा॑
 । स॒र्वस्मै॑ । स्वाहा॑ ॥

TS 7.3.19.1**TS 7.3.19.1****Samhita Paata**

ओषधीभ्यः स्वाहा मूलैभ्यः स्वाहा तूलैभ्यः स्वाहा काण्डैभ्यः स्वाहा वल्शैभ्यः स्वाहा पुष्पैभ्यः
 स्वाहा फलैभ्यः स्वाहा गृहीतेभ्यः स्वाहा ऽगृहीतेभ्यः स्वाहा ऽवपन्नेभ्यः स्वाहा शयानेभ्यः स्वाहा
 सर्वस्मै स्वाहा ॥

Pada Paata

ओषधीभ्य इत्योषधि-भ्यः । स्वाहा । मूलैभ्यः । स्वाहा । तूलैभ्यः । स्वाहा । काण्डैभ्यः
 । स्वाहा । वल्शैभ्यः । स्वाहा । पुष्पैभ्यः । स्वाहा । फलैभ्यः । स्वाहा । गृहीतेभ्यः ।
 स्वाहा । अगृहीतेभ्यः । स्वाहा । अवपन्नेभ्य इत्यव - पन्नेभ्यः । स्वाहा । शयानेभ्यः । स्वाहा
 । सर्वस्मै । स्वाहा ॥

TS 7.3.20.1**TS 7.3.20.1****Samhita Paata**

वन्स्पतिभ्यः स्वाहा मूलैभ्यः स्वाहा तूलैभ्यः स्वाहा स्कन्धैभ्यः स्वाहा शाखैभ्यः स्वाहा पर्णेभ्यः
 स्वाहा पुष्पैभ्यः स्वाहा फलैभ्यः स्वाहा गृहीतेभ्यः स्वाहा ऽगृहीतेभ्यः स्वाहा ऽवपन्नेभ्यः स्वाहा

शयानेभ्यः स्वाहा शिष्टाय स्वाहा अतिशिष्टाय स्वाहा परिशिष्टाय स्वाहा सशिश्टाय स्वाहो-च्छिष्टाय
स्वाहा रिक्ताय स्वाहा अरिक्ताय स्वाहा प्ररिक्ताय स्वाहा सश्रिक्ताय स्वाहो-द्रिक्ताय स्वाहा सर्वस्मै
स्वाहा ॥

Pada Paata

वनस्पतिभ्य इति वनस्पति - भ्यः । स्वाहा । मूलैभ्यः । स्वाहा । तूलैभ्यः । स्वाहा । स्कन्धैभ्य
इति स्कन्धः - भ्यः । स्वाहा । शाखाभ्यः । स्वाहा । पुर्णेभ्यः । स्वाहा । पुष्पैभ्यः । स्वाहा ।
फलेभ्यः । स्वाहा । गृहीतेभ्यः । स्वाहा । अगृहीतेभ्यः । स्वाहा । अवपन्नेभ्य इत्यव - पन्नेभ्यः
। स्वाहा । शयानेभ्यः । स्वाहा । शिष्टाय । स्वाहा । अतिशिष्टायेत्यति - शिष्टाय । स्वाहा ।
परिशिष्टायेति परि-शिष्टाय । स्वाहा । सशिश्टायेति सं - शिष्टाय । स्वाहा । उच्छिष्टायेत्युत् -
शिष्टाय । स्वाहा । रिक्ताय । स्वाहा । अरिक्ताय । स्वाहा । प्ररिक्तायेति प्र - रिक्ताय । स्वाहा
। सश्रिक्तायेति सं - रिक्ताय । स्वाहा । उद्रिक्तायेत्युत् - रिक्ताय । स्वाहा । सर्वस्मै । स्वाहा ॥